



程侍郎遺集初編卷八

河南按察使嚴公神道碑銘

公諱士鉉字震叔又字筠亭江蘇丹徒人先世太學生
永中居汴當宋靖康時與太學錄陳東等擊登聞鼓請
留李綱不報遂渡江而南居京口爲遷丹徒始祖曾祖
之錫祖榮德輕財好施喜交魁儒碩彥鄉里敬之貶贈
中憲大夫父璟晉贈中憲大夫妣華氏曹氏贈恭人公
爲中憲第三子少端靜及長儀度修偉性沈毅寡言笑
喜愠不形於色工文辭尤留心經世之學公叔祖元燮
以名進士教於家窮經治史旁及星緯象數公從遊盡

得其傳乾隆丁酉科公舉選拔以知縣試用四川攝秀山內江題補墊江將赴任以憂去服闋攝天全州攝成都兼攝金堂題補犍爲攝樂山奏調華陽以軍功擢資州尋擢知甯遠府事攝夔州府事奏擢川東道攝布政使攝永甯道攝按察使擢湖南按察使調河南按察使未之任以疾去公善折獄任華陽時有以貲得道職仍充潼商負犍商本不歸犍商訟之某怙勢亂鹽法不爲屈公讞定禡其職加桎梏豪猾奪氣又有以貲得副指揮某利釐叔母財誣其與婿姦訟諸按察使飭公會鞫釐懷利刃欲自剗于訟庭公廉知之訊其指姦無證乃

坐誣告者釐與宗人數百伺公出焚香泥首馬前又富家某賃一婢忽逃去婢家以謀殺控公方集人證研鞫時按察使承差明招佐者陰偵伺日一至縣庭公疑之廉得招佐匿婢狀蓋招佐嫌富家欲陷之公帶幹役出不意於二鼓後排闥入獲婢卽禽招佐論如法公發姦鋤強類如此平反獄至多錄其犖犖大者公尤知兵乾隆六十年湖南苗疆軍興福文襄王帥師進剿孫文靖再督四川駐節秀山時公攝夔州府事府據白帝控瞿塘萃水陸之險又東縮宜昌東北袤鄖陽北指興安南涉施南古戰爭地也公亟修水陸營堡誅匪徒潛伏者

未幾白蓮教匪齊王氏姚之富張漢潮覃加耀等起分
竄荆襄宜施各府在在與夔州牙錯公亟請於孫文靖
撥權銀集團勇積穀練兵爲守禦計選健卒數十人布
所轄六邑偵姦細而大甯之一碗泉開縣之周家槽有
伏寇公會營弁疾馳掩擊殆盡是時川中教匪尙未蔓
延故旋起旋撥滅文靖又以巫山爲川東門戶檄公守
焉巫山郭俯江憑大甯河距楚境不百里而巴東之培
石遼箭槽拐子坪皆有教匪欲攻巫山城得則據之不
勝則奔湖北與大股賊合其酋曰侯光斗李宗嵩無何
侯之宗人告變公時出巡陪石聞之遣親信入山偵卽

約都司徐朝綱議剿撫時公度賊密約已久而未發必
脇從者眾心力未齊也乘其未發撫之則不煩兵矣語
都司都司奮曰朝綱任巫山久與各寨居民習當爲公
往公握其手下拜曰君信有膽識某亦同往義不獨令
君勞也各帶僉從數人而分撥兵勇每五里置二人爲
急遞脫有變卽馳歸報巫山使登陴守瀕行探卒旋曰
居民數萬戶教匪三之一耳公與都司徑入不三十里
有冠儒冠者十餘人迎於馬首詢何姓皆侯李也曰來
者非太守與都司耶曰然曰是不可入中有教匪數千
戶將揭竿奔湖北矣都司曰知之眾曰旣知之何不帶

兵而單騎入都司曰吾與太守不以教匪視吾民奚兵
爲且爾等不聞湖南苗疆凱旋之兵十餘萬圍賊於巴
東之黃柏山不日盡剿無孑遺乎彼棄其田廬墳墓妻
子欲往助至卽授首耳愚甚彼能悔教從我我與太守
能生之眾頓首泣下曰太守與公來某等活矣某等亦
誤入教者公於是拔佩刀裂短後衣一幅示之曰所不
許爾投誠而食言者有如此衣眾曰首逆謀者侯光斗
李宗嵩耳某等願禽以獻公卽委候補員馬鳴鑾吳國
鴻各率兵勇往追捕自與都司徐分厯各教匪巢穴宛
轉曲諭十餘日而徧皆革心爲良民尋獲侯光斗李宗

嵩斬之公下令赦悔教者於是數千尸人歡聲若雷嘉
慶二年川東達縣之王三槐徐添德川北巴州之羅其
清冉文儔等蠶起陝西亦然三省連兵會剿而賊愈熾
參贊德楞泰公駐兵開縣之大團包公在參贊營總糧
餉乃獻策曰齊團練使之守招鄉勇使之戰參贊躡之
公招集鄉勇一月餘得萬人選隊長二一爲桂公涵一
爲羅公思舉今皆官提督總統宜綿公參贊德楞泰公
奏公勤力奉

旨賞帶花翎時賊匪出沒不恒德公屢挫之因選勁旅
乘夏漲爲下峽計公馳入夔州集兵船三百艘載官軍

隨德公自夔門下抵宜昌德公登岸將整隊忽前鋒偵報賊匪不入鄖陽將竄荊州出襄陽以齊王氏樊城人樊城接南陽德公恐震中州計賊匪已過宜昌不可追甚憂之公進曰可仍由水路下荊州因手令箭傳呼曰兵船無散仍載大兵下荊州舟子皆夔人感公舊政均踴躍時宜昌餉絀不能給船值公卽以川餉給之剋日請德公登舟德公喜曰此行扼賊不使過南陽君之功也果及賊於荆襄敗之復敗賊于鄖陽殲之公以軍功加道銜隨德公營至漢中府漢中與保甯接公調川兵及餉遂至保甯之廣元而土匪何四蠻刀等欲起應賊

公禽其首撫其餘境內以安大府上其事以道員卽用尋授川東道仍留軍營嘉慶十一年陝西甯陝新兵叛川東毗陝西省公赴綏定籌邊而綏定新兵亦翻城出欲由新甯竄巴山公卽檄桂公涵迎擊盡淨時事起倉卒公籌畫凡十晝夜不寐公自乙卯兵興迄辛酉功竣凡七年在戎行運用神速知山川夸險故所策多勝筭恒出諸將帥先耐辛苦尤儉約食等士卒卧一敝穹廬不避燥溼寒暑卒以是致顛眩疾大兵之後川北一帶州縣有未治城郭者方伯方公積議開南江老林招商出售可得城郭賞請於常齡公檄公往勘公按行一閱

月致書方伯以五不可阻之大旨謂南江山谷阻深毗
陝西漢中爲南棧別支賊匪初平人宜散不宜聚聚則
易因緣爲姦而兩省墾荒之人不下數十萬皆衣食此
山一旦設厥伐木是奪其利又老林爲縣屏蔽伐之恐
地脈傷方公得書白制府罷之未幾陝西南山大饑木
厥倡亂人皆服公先見襄平相國蔣公攸銛時督四川
知公練達詢以川省情狀公條吏治兵政邊防盜賊四
事大約謂蜀中州縣起科目者半起投效者半易分門
戶角技能又瘡痍之後弱宜撫強宜戢當判其才之寬
猛使各盡其長去其短拘常例輪委則上才屈揣地方

肥瘠則私門開又軍功超遷往往起微末游至方面流
品至雜尤宜審擇蜀中兵久戰故兵強兵強則易叛糧
帑不可移動訓練不可廢弛以勇將兵以誠將將則百
萬統于一邊境番夸之黠者北曰果羅克三部南曰瞻
對三部又建昌道所屬各州縣永甯道敘州府馬邊戎
邊雷波等處民番交錯易侵占啟釁盜賊之尤者曰嚙
匪嚙匪有專律格殺勿論其民浮囂易動故剽掠作姦
不獨莠民富室豪強亦爲之且匿猾與通賄尙巫信祆
好結盟黨皆教匪之漸公所陳皆遠大蔣公一一施行
蜀以大治始公以知縣辦西藏軍務大員某廉從入局

索夫馬勢甚張公立擒治論如法嘉慶四年川督勒公被逮以某公代某公至將興大獄公從容陳白以情理折之其事遂解人謂公善用剛柔有如此公以嘉慶二十四年疾劇在告道光六年就養于楚南官舍八年夏感熱疾秋不起享年八十有三夫人趙氏封恭人晉淑人先公十有一年卒子三長學瀛候選鹽場大使爲公兄士銓後前卒次學淦舉人署湖南耒陽縣知縣三學澄候選縣丞前卒孫六榕廷枋樽榆標承曾以道光十年正月初七日葬公於城西曹王山枝之徐灣原趙淑人祔焉記澤官黔時識公門下士糜方伯奇瑜方伯稱

公德量智術不去口恒奉以爲法尋澤移官楚南以年家子禮拜公公時年過八十言語姁姁猶未釋恭去歲從蔣襄平夫子遊夫子譽公一如方伯所言嗚呼魁儒長者芳烈之昭著如是是可銘也已銘曰

其量淵淵其才磐磐洞深察微秉經達權市朝原野皆天所棄戰人之命匪仁曷恃五過有疵弱肉餒強公折鉅豪剽狼卹庭用武之國死若薙草公起白骨授以文裸或摧機牙或爭須臾騰趨飛行如風御虛烽銷馬卻雍容坐論東井有絡西川如鏡卅載服官七年枕戈心燔欲枯筋憊猶磨屨億鏹退無四壁布裘白髮危坐

獨息有子謙慎循吏通儒公活萬生流慶必都武惠山
側嶽嶽華表過者式焉視此有道

戴尚書神道碑

文光弼銘
尤極

道光十年六月二十八日署工部左侍郎前四川總督
戴公薨於京邸

旨加尚書銜照尚書禮賜卹越七月二十三日禮部尚
書湯公金釗奉

旨賜奠於私第戶部工部各遵頒發祭葬銀如例其年
秋公之喪至鎮江其嗣君郎中於義寓書於恩澤屬撰
神道碑恩澤於公有世誼且辱公知好甚久不敢以不

文辭按狀公姓戴氏諱三錫字晉藩號羨門江蘇丹徒
人曾祖京鸞祖士鵬湖北嘉魚縣典史父紀入籍順天
補府庠生考取三禮館校錄江蘇青浦金匱主簿三世
皆以公貴累贈榮祿大夫例晉光祿大夫母張氏凌氏
累贈一品夫人公讀書期大用不為無益之學尤樂觀
古名賢大君子出處施設中乾隆丙午科舉人癸丑科
進士以知縣用署山西潞城縣補臨邑縣縣彫劫公撫
字有方以治行聞時公父光祿公母凌夫人春秋高不
能就官舍養公思慕不置一旦引疾歸而光祿公凌夫
人俱馨膳不半載相繼歿人謂孝感若有先告云嘉慶

五年服闋引

見奉

旨發往四川。時蜀方治軍，公至，卽攝營山縣。縣當四達之衝，供帳絡繹，公籌備無誤。補南充縣，攝綿州知州，擢峩邊廳撫夷通判。公在綿有惠政，去之日，父老遮道哭，請建生祠，公力卻之，乃已。歷攝資眉邛各直隸州知州，成都府通判，保甯順慶夔州成都各府知府。嘉慶二十一年，公再攝邛州。時有姦民黃子賢等嘯聚，亡命千人，約以州試文章，日乘間發。公偵知聚謀之所，屆期仍扁試如恒，密遣民壯數百，突往捕，悉禽之。案具，大吏欲以軍功奏，公請戮首惡一，餘以軍流處之。得

旨獎飾。時公已擢茂州知州。二十三年，擢甯遠府知府。道光元年，擢建昌兵備道。時雲南永北廳夷匪啓釁，與甯遠界一金沙江，川民騷動，公募鄉勇集數百人，昕夕練習防衛。永北難民沿江就食甯遠，甯遠兵弁欲禁，不使渡江，公謂避難皆赤子，悉嫗撫之，全活不下數萬人。兵旣息，難民感公德，不願旋，因著籍於川。時制府蔣公素以人才爲己任，見公略能禦疆，仁足撫眾，牘薦甚力，自是公膺特達之知，不三載卽以布政使署總督，蓋

聖主知人之明，大吏舉賢之誠，我公忠實之政，遂昭著於天下，而天下百職事咸奮勉守道益篤。

朝廷遂收得人之效，實自公始。其年擢四川按察使，二年擢江甯布政使，引避原籍，調四川布政使，三年奉旨以二品頂帶署四川總督，後復署成都將軍，五年奉旨實授四川總督。公久宦蜀，知蜀民立懂好勇，教不先也。於是正書院規制，增義學三千餘區，拓考舍一千餘區，使士表其民，民化于士。又以治兵定亂，須摧其機，讞獄科罪，須平其衡。蜀舊多事，非時過乃發，致患禍成，卽好殺喜功，不幸而激大變。七年，新都姦民楊守一等倡

邪教，造妖書，公弋獲之，立正典刑。越雋生番恃險遠，時出沒劫商旅，掠婦女，僉議欲加兵，公但飭吏捕狙黠者數十人治之。雲陽鹽販拒捕，守令以夥梟論，公謂售由官肆，則非私，販止十人，則非夥，當以重辟過矣。惟當治拒捕罪耳。官吏稱允。其他濬渠堰水利，禁販鬻子女，斷鐙嬉侈靡，掩埋軍興死綏之骨，表彰國殤不屈之魄，凡有關於世道人心者，靡不修舉。傳云：公家之事，知無不爲。惟公有焉。七年七月，公七十壽，前期卽蒙恩賚，并

賜御書數猷篤慶額。時公哲嗣於義，任吏部員外，恭齋

赴蜀時人榮之九年內召署工部侍郎奉命恭詣

東陵

西陵查估歲修事十年奉

旨以原品休致公具疏謝

恩蒙

召對

上諭以居官甚好全始全終公免冠謝公以久宦思省
邸墓入秋擬遣歸卽以是年六月得氣壅疾薨於京邸
春秋七十有三公長身火色目爍爍有紫光性清峻不

受饋獻事上唯謹不阿從處同列以私不以已長掩人
短精力適厚每當繁劇益見縝密極嗜翰墨工行楷尤
工漢隸手錄書及讐校書盈篋喜讀薛文清呂新吾兩
先生書記道光元年恩澤典四川試見蜀士民述公爲
州縣時視民若子姓其班春也過一村墟則父老咸邀
停車奉茶果爲壽姬攜幼稚纍纍環車前公類能指其
姓氏與父老話農事課雨晴偶及家人瑣屑皆歡然應
雜然諾間有以事角口者求辨于公公爲譬況卽散去
歲斷獄甚簡於戲庶幾古循良之風復見於今矣公配
張氏累封一品夫人子一於義甲戌科進士官吏部郎

中女一、適山西試用知縣呂兆熊孫一、明女孫一、以
年 月葬于 山之 原銘曰、

大善之積、自微成著、下位廿年、曾不數載、

天子有命、統東西川、

天子壽公、公七十齡、不懈益虔、文師文黨、武師武鄉、謀

略炳然、人震貴速、民知

主聖、公宜累遷、所居父在所去、母失、咸戴二天、封圻遠

民、惠罕下逮、獨公如前、鄙赫赫名、曲突火始、拔毛斧先、

歷少壯老、束身清勤、植志貞堅、

恩禮始終、進退綽綽、曷歸乎田、不及省墓、公心不怡、奪

公何過、墮淚之碑、遺愛之碣、過者式焉、

贈長蘆鹽運使伍公神道碑銘

公諱光瑜、字孚尹、號屏秋、姓伍氏、始遷祖德全、精麻學、

明洪武朝、授刻漏科、博士、掌欽天監事、賜第宅、居金陵、

歷五世、皆世其官、六世少西、以助振、賜四品冠帶、旌曰、

高義、曾祖致遠、以嗜古善鑒、藏稱祖宗、鯉以孝稱、父守

旃、太學生、以廉讓稱、兩世俱累贈中議大夫、妣楊氏、陳

氏、俱累贈淑人、公生三歲而孤、少卽穎悟、母督讀書、寒

暑無間、稍長、治羣經、尤邃于易、善讀史、嘗錄成事、核所

行得失、性好善、見善必爲、爲必有成、乾隆間、上元江寧

兩學宮將圯公與同學倡一錢約積數年整其圯如新
嘉慶廿一年羣議重建江寧府學明倫堂賴公成之廿
四年大成殿災節相孫公玉庭議修復公又成之是年
九月之晦大成殿先考漏初下殿上騰白光如晝又十
一月晦日將夕有黃雲羃櫺星門蓋公自束髮時每月
朔望必齋沐拜大成殿階下及是又督工竭心力人皆
謂誠敬有符驗由積累所致云公倡恤嫠局曰同善堂
行之有成效而慮宦士族之嫠不能與歲暮必措貲計
戶厚飲之公倡拯生局曰生生堂法於大江磯泖設拯
溺船一歲內風濤險巖全活無算又塗有殍者恒以廩

民畏牽匿不報致暴朽公偕眾白之大吏定規制凡途
殍卽報局驗瘞嘉慶十九年江寧大旱百文敏公募助
振公時方抱疴力疾偕紳耆勸輸凡五振九閱月乃畢
大吏入奏奉

旨議敘主簿銜公以餘羨白大吏發質庫權子母作備
歉用迨道光三年大水發節相孫公復勸輸不給用而
公所請權子母已積鏹二萬餘取以益之乃足上元江
寧軍船之制有運籍有快籍快丁例助運丁費苦累殆
不支快費不解則官呈議催比急則丁死官與丁已交
困又快丁啖黠胥口攀齊民誣在快籍比辨明家已破

則困及齊民先是漕督許公兆椿守江寧時置官洲以劑快丁困而每年運糧造舟之助尙不給公請借庫貯若干勸快丁募捐若干皆權子母而運造一旦俱給是舉也快丁有恒產則丁便民免誣攀則民便官無催比過當則官便無繳繚糾纏則運亦便於是江寧所轄各縣有快丁籍者俱仿公所爲行之循江至安徽聞風相效蓋公倡率之功幾徧東南維矣澤至江寧公適病尋卒凡哭公者皆失聲因究公樂善之專魄力之厚則咸謂公至孝友務調卹自門內逮姻友俱徧乃知推暨覆被之廣且大由孝友然也不先本原而務施博又烏

能施博哉公好詩著有補園集以道光十年四月卒于里第春秋七十有三歲貢生候選訓導議敘主簿銜以子貴累封中議大夫夫人馬氏累封淑人性好善與公同志凡義舉助公尤力子若孫曾林立且教且撫寢門以內離離如也上下忻忻如也先公三年終于長蘆官廨春秋七十子六長齡歲貢生舉孝廉方正以知縣用長華進士 廷試第三名授編修累官長蘆鹽運使長英舉人湖南常德府同知長松長馨俱庠生長貞殤女三長殤次適孫玉銘次適馬功浩孫十女孫十九曾孫女二以某年某月之吉葬公某山某原銘曰

葉陽助王息厥民億萬人值銜溢恩手拯活之口弗論
護聖杖履鍾離意葺絲竹壁謹殿概凡公所守敬無肆
積善袞袞福其嗣

戶部福建司郎中鶴皋祁公神道碑銘

公諱韻士字諧庭一字鶴皋姓祁氏山西壽陽人祁爲
晉巨戴其占籍壽陽自河東公始至公十有五世曾祖
敬德祖雲瑞贈朝議大夫贈榮祿大夫父文汪贈朝
議大夫晉贈榮祿大夫妣賈氏贈太恭人晉贈一品太
夫人公穎特善屬文自幼喜治史於疆域山川形勝古
人爵里姓氏靡不記覽年十有九館於靜樂李氏李氏

多藏書書樓十餘楹且弄善本公寢饋凡五稔益博洽
乾隆四十二年拔貢生是秋鄉試中式明年會試中式
官翰林五十年大考翰詹名列二等五十四年京察一
等記名以道府用五十五年擢右中允五十六年大考
翰詹改戶部雲南司主事嘉慶四年授河南司員外郎
五年升郎中秋八月充順天鄉試同考官六年充寶泉
局監督在局兩載九年局庫虧銅案發歷任監督皆逮
問下獄故事交卸憑冊籍不盤盤有期公不及盤期故
無自檢覆十年同逮之監督五靈泰遣子申訴得未減
發熱河公與宗室鳳麟等戍伊犁始公在史館也奉

旨創立蒙古王公表傳。稽文恭爲總裁。知公深屬公任其事。公核立傳體例。計內札薩克凡四十九旗。外札薩克若喀爾喀土謝圖汗車臣汗札薩克圖汗賽因諾顏若青海若阿拉善若土爾扈特杜爾伯特多至二百餘旗。及西藏及回部。均應立總傳分傳。而苦無徵。館送旗冊亦雜亂紛糾。卽人名重累驟不可逗。乃悉發大庫清字紅本分檢之。有涉外藩事跡者。擇要詳譯作底冊。每于塵空中有所得。共詫爲異聞。於是按部落條析之人立一傳。必以見諸實錄紅本者爲確。復據

皇輿圖西北垂亘域爲綱領。據理藩院世譜訂王公等派系。凡八閱寒暑而成。計書百十二卷。終始佐公者。則郭檢討在達也。及公戍伊犁也。則創纂伊犁總統事略。別摘山川亘里。爲西域釋地。蓋公學自乙部入。窮源流。薈萃貫弗。能擘其鉅。實經世可施用。性介直自將。不逐時爲俯仰。遂見抑於權要。力殫苦不食報。而師友皆名儒偉公。以文字受知。則朱文正王文端阿文成紀文達曹侍御錫寶金殿撰榜。汲引若不及。戴文端那文毅松文清則服公才識。斷大事必咨之。及其趨萬里歸來。以著書佐治授經。老爲客而歿。嗚呼可悼惜也已。公繼

室劉夫人智識英毅公遣戍後家破夫人攜子輩還壽陽亟延師爲授學以鍼黹所入具師饌必潔酒肉而自攻苦食淡比公歸公之嗣君今閣學寓藻學有成入翰林人謂慈教半嚴教焉及閣學視學楚南背公久矣太君訓之若童時小拂意輒令長跽受杖環楚南人皆頌學使之廉敏有所自署內外斬斬無不憚太君者恩澤與閣學契交且同直十餘年一日閣學謂恩澤曰憶先公在狴狴奏當重辟寓藻甫十一齡與世弇實侍側聞翼日讞上當勾寓藻股弁泣涕不自勝先公意殊泰然就燭下爲削詩文章數首引枕鼾睡迄今思之森森

若身置刀戟林也嘉慶二十年三月二十五日歿於保定書院年六十有五官郎中 誥授奉政大夫以子貴晉贈榮祿大夫內閣學士兼禮部侍郎加二級配弓恭人先公卒年三十劉夫人後公卒年七十有一皆贈一品太夫人子六歲藻增貢生四川鹽場大使宣藻殤宋藻國學生候選府檢校富藻殤寓藻內閣學士兼禮部侍郎 南書房行走宿藻舉人女三長適候選訓導王敷政次適兵馬司吏日閻庭椿次適候選訓導張麗暉孫七世弇優貢生候選訓導世庠庠生世齡舉人世舒國學生世佶世敦世長女孫二公著有藩部要略若干

卷西陲要略若干卷西陲總統事略十二卷西域釋地
二卷萬里行程記己庚編書史輯要珥筆集袖爽軒文
集覆瓿詩集濛池行藁西陲百詠訪山隨筆若干卷嘉
慶二十三年公暨弓太夫人葬於葦上之原道光十有
四年八月某日劉太夫人合塋封閣學屬恩澤爲神道
碑銘於墓道東南銘曰

公性介而和伉爽而英多學璞沈而輝華喜會友以文
清酷雅歌括史例通國書指掌輿圖蔚然著作家才富
遇嗇命也柰何不於其身於子若孫視此豐碑之峩峩

光祿寺卿興縣康公神道碑銘

道光十有四年四月二十五日前湖南巡撫康公薨越
明年其孤兆奎以武進李兆洛所爲行狀乞余銘神道
之碑余故知公者故剟其大要以顯焯之按狀公諱紹
鏞字鏞南別字蘭臯其先自陝遷山西清源數傳至登
有又自清源徙興縣今爲興縣人曾祖萬方祖惇俱縣
學生贈資政大夫江南河道總督晉贈振威將軍生基
田官南河總督次基淵卽公考也與兄皆以進士縣令
起家歷官江西廣信府馳贈中憲大夫晉贈振威將軍
兼提督曾祖妣郭氏祖妣王氏妣孫氏王女生妣顧氏
皆贈封一品夫人公兄弟七人於次居五生而資性過

人年十二廣信公歿於任執喪如成人乾隆壬子科舉
山西鄉試嘉慶己未科成進士引
見用兵部主事補軍機章京充會典館總纂修官歷兵
部郎中鴻臚寺少卿通政司參議大理寺少卿鴻臚寺
正卿公之官大理也當嘉慶十八年林清首亂畿南山
東河南教匪響應公方隨

扈塞外作小冊備書三省阨塞險要及將弁能否兵數
之多寡適會

上問當軸卽以其冊進

仁廟由是知公才可大用擢安徽布政使

陛辭

上命之曰爾有老母皖江一水可通毋慮迎養時安徽
四十餘縣皆旱災公諭勸富室捐資各振其鄉凡輸銀
九十萬兩米麥七十餘萬石益以帑項數十萬兩荒賴
以濟然皖省數災而藩庫止存三十餘萬兩其借支款
項有出無入公嚴杜借支當奏銷時卽於州縣應領項
畫抵正供省一領一解之費庫貯增多二年之內實積
帑三百二十九萬八千餘兩某年擢安徽巡撫公自少
負文武材機神開張不主故常鱗雜粟錯消以囊篋喜
跡弛異量之士務立名義功業有可成就及任封疆益

以艱鉅事爲已任不恤常談浮議安徽巡撫銜故兼提督而廬鳳賴民俗悍輕崩宗瞞氏之族村里相望又洪澤湖大江及阜陽亳州水陸奔轉爲私梟捻匪所出沒公相其扼要繕營房立巡船先後擒治李才楊七等五十餘人奏置之法盜乃戢又擇標下伉健者每日五十人入內射堂角藝募精技擊者教習而時賞罰之公自幼喜習騎射所至完器械簡卒伍後在湖南造擡槍數十桿以教撫標二營至猺人稱亂猶賴其用二十四年調任廣東時總督祝嘏入京兼署其任明年三月入

覲奉

命於回任時赴豫察視馬營壩及儀封漫口

今上元年有

旨查辦陋規公奏數千言大意以陋規入奏似非政體若奏減其數則不減者官吏皆明目張膽視如廉俸而已減者且額必私增若盡裁之官不能堪反益病民議遂寢在粵二年先後緝獲劇盜會匪數十案行旅以安是年六月入京署禮部左侍郎奉

命偕相國松筠赴浙查辦事件丁願太夫人憂服闋以禮部侍郎出爲廣西巡撫旋調湖南巡撫苗疆自故按

察使傅公蘊經理之畏帖者二十餘年公視事後卽修
葺傅公所築碉卡二千餘處禁民人毋得入苗疆射利
以兆豐端洞庭湖多盜環湖州縣以水上道里遠近不
明相誘避盜不時得公定其界址爲圖常置左右嚴徼
巡令無文武無敢不用命編查漁舟如保甲法盜無所
容而公猶以苗疆自初平時官其桀驁者羈縻之今日
久倚官作威致凌犯自相殺不治則損威治之則法重
如戕官例難盡行多設苗官未爲有益反益生事惟詳
考其所轄道里近遠可歸併者缺出不補以次漸裁庶
無後患欲陳奏之未發也而適值六年水災其醴陵茶
陵數縣城郭皆敗壞民田廬無貧富皆盡捐輸不可行
而費用廣視安徽旱災事尤劇分率司道分行撫卹拯
民於高阜而棲之行糜粥及藥物棺槨乞
恩展振及修屋宇費皆得

俞旨公伯父河督公善言水利公幼習之撫安徽時修
堤堰於濰河北股河以遏黃水由減水滾水諸壩軼入
靈壁宿州者又築捍江堤千二百丈於無爲州之黃絲
灘及湖南水災後復澧州田侵入夕陽湖萬四千五百
畝排水去污皆可耕其不可耕者萬一千八百畝豁免
起科分別奏行至道光九年入

觀陳苗疆事宜

上命與督臣熟籌之議未定而公入爲光祿寺卿旋致仕道光十四年四月二十五日卒於河內里第年六十五公直軍機十年受特達知巡撫四省

賜天府圖書稠疊優渥所建立多灼灼可指白而公常慊然未盡與僚友言每深慕孫文定陳文恭之爲人也事太夫人竭情承歡不計費多寡深友疏客莫不意滿配封一品夫人趙氏子二兆奎正二品廕生刑部直隸司郎中記名以道府用兆臺國學生孫錫齡縣學生

與齡成齡椿齡億齡俱幼以道光某年月日葬於某縣某鄉某原銘曰

謹出納以裕封椿不積而贏是師研桑日肄金版補苴泰平要隘允猶可治川治兵筦數大事雄略偉斷憑陵談笑懦者悚難事君事親有古名臣我稔知之於洞庭之濱流丸歐臾公稔知之我銘幽宮實無隗辭

翰林院修撰汪先生墓志銘

高宗純皇帝御極之四十五年歲在庚子臨軒策士時賜及第第一名二名三名皆鴻才博學負天下清望而先生以會試第一膺

殿試第一。授職修撰。年甫二十六。長身玉色。眸子顧盼炯然。朝宁偉之。四十八年。充三通館纂修官。本衙門撰文。是年冬。奉

旨入直

上書房。五十一年。典山東試。是年冬。督雲南學政。使還。仍入直。五十六年。以本生母憂去官。五十七年冬。服闋。仍入直。五十九年八月十五日。先生疾終。凡通籍十有五年。得年四十。先生姓汪氏。諱如洋。字潤民。號雲壑。浙江秀水縣人。先世居休甯。國初遷桐鄉。曾祖繼燦。吏科給事中。祖上埒。雲南大理府知府。父仲鈞。舉人。贈奉

直大夫。母許氏。封太宜人。本生父孟銷。進士。吏部文選司主事。誥授奉直大夫。以先生兄如藻官。晉贈朝議大夫。本生母祝氏。贈宜人。晉恭人。金氏。封宜人。晉太恭人。汪氏。自先生以上五世。文望輝赫。祿位踵於朝。先生蚤慧。博覽典籍。雄於文。豪於詩。試輒冠軍。每一篇出口。相傳以熟。走數千里。垂數十年。諷詠者恒不絕。及其冠倫魁。侍

禁近。文若詩益鴻麗。名益譟。天下士識其面者。以爲瑞性。沈厚。喜怒不形。外和易。內方介。守潔用敏。設措部分。才常什伯人。其視學滇也。滇士志學而苦無師。先生行

教家塾子弟法。每試一題。則操管成一藝。試畢示諸生。卽召諸生環案前。爲評隲點竄。言語恂恂。使充然各有所得。於是滇之文日以上。旁及詩賦。皆雕繪可誦。值己酉遴選科。得人稱極盛。時功令當以五經並試。先生以士專經久。遽使兼習。或未能驟通。奏請每科以一經輪試。輪畢然後並試。得

旨俞允。先是大理公惠愛在民。歿有廟祀。屢著靈異。先生按試大理。拜謁於廟。郡人以為明德之後。必有達者。天道之可信如是。相與焚香擊跽以送。先生自使滇還朝。

帝心益眷顧

優獎渥賜俱稠疊。而先生涵養粹厲。躬躬匪懈。知與不知。皆以公輔之望歸之。孰意年甫至彊仕。官未轉一階。抱其瑰璋。奄卽長夜。有識者皆歎生才之不易。而才不竟其用。爲尤可惜也。先生同及第第二名爲江文德量。其三名卽先大夫。先生視滇學。

上書房缺出。先大夫實充焉。又先後同直廬。出肺附論契好。每當春秋佳日。吟和談讌。翛然意遠。其視權要熏灼之門。若水火之不可蹈。憶恩澤總角時。先生一日借江文集先大夫廬。恩澤出拜謁。因得識先生風範。迄今

思之。座次言次，悉在眼。何江丈先歿，次年先生歿，次年先大夫歿，嗚呼其舉也。連茹其歿也，踵相接，知先世結締非偶然，而恩澤以十齡孤露之身，忽忽三十餘年，追銘大君子之墓，抑何幸也。又何哀也。夫人陸氏，封宜人，例晉太宜人，清德世宦，篤生賢淑，逮事二姑，皆得歡心。先生早世而家以不墜，教其子成名繼志，以揚以顯，皆太宜人力。後先生三十六年而卒，享年七十有七。子三世，植邑庠生，世楠附貢生，雄縣知縣，世樽進士，官編修，提督湖南學政。女三，長壻江西贛南道，加按察司銜。潘恭常，次壻直隸香河縣主簿，管嗣許。次壻邑庠生熊鍾祺，孫三，葆煜、葆烜、葆光，女孫六，先生著述甚夥，多散逸，惟葆沖書屋詩集若干卷，手自編也。詩奄有唐宋諸大家風，卓焉可傳。以道光九年十二月吉日，合葬於嘉興縣六萬金港之原。銘曰：

豐其才，嗇其德，則不竟其庸也。先生則才曩括於德中，純鉤之鈿，而夫襍其鋒，宜壽且崇，而位未躋乎列卿，書未滿乎名山，尤可恫也。宜後之人接武而隆隆也。

候選同知李君墓誌銘

代

君姓李氏，諱冀，字堯階，號竹君。故金陵世族也。曾祖國柱，祖春，父師韓，歷任石阡南康知府，誥授中憲大夫。

晉贈資政大夫妣凌氏封夫人生母徐氏封太恭人君
年十二資政公及凌夫人先後棄養君哀毀骨立如成
人事生母徐太恭人孝養周至尤慎疾疾則晝夜旁皇
無措必安乃釋昆季凡六君居四志趣不必盡同君處
之盡恭友仲兄蘭疾篤君念承先業非仲不克支乃焚
香告天願以身代仲沒後教猶子尤盡瘁兩江秋試人
數至多恒苦號舍隘每錄遺輒多所屏棄君請於邑宰
白大吏願捐貲購隙地增號舍遂剋日鳩庀得八百餘
間多士德之嘉慶十九年江甯游饑君捐貲無慮巨萬
復于城西永慶寺設粥廠目視手告疲執不少休使老

羸皆得所全活無算君家世席豐廡約出之人以爲侈
謙出之人以爲倨君躬躬守盈泰之戒故堅持淡泊之
志力行施予之惠誦法談道一滌金幹玉相之習而靜
慧相發藻翰炳炳亦非時輩所跂及余知江甯府時君
應童子試見其文異之事竣來謁則儀兒玉映進止溫
雅知其澤於詩書者深是年君遊邑庠就余問字余欣
然以爲爲 國家得一俊傑尋余莅淮徐君送餞江滸
猶殷殷訂後約不數年而君之凶耗至矣世有豐其德
嗇其遇者則必不嗇其壽今君數舉未得一第而其年
甫壯而折若有可爲盡齋以歸九原嗚呼是可哀也已

君生於嘉慶二年六月卒於道光十一年二月得年三十有五上元縣學附生候選州同知 賜五品銜 誥授奉政大夫馳封中憲大夫娶于氏封恭人子二長作霖次作柏女一以 年 月 葬於 城之 山原銘曰
崇其心田真意盎然以從王事則專也處富若施人卽忘以蓄已德則昌也舉舉其兒熊熊其文宜狶青雲而齋志未一伸也棗強之墓輔嗣之墳是生大雲以覆露其後昆也

王君元長墓志銘

君諱大善字元長姓王氏世爲歙人曾祖廷格祖士璠父文逖兩世皆贈奉政大夫妣余氏贈安人君性強立能任事尤工心計世父某業淮北鹺算細多負命君振之君力竭度無可爲棄而之毘陵毘陵亦世鹺業也君稱貸籌什一業以大興嘗語人曰凡業鹺當察天時審人事知物力贏絀則天時得知俯仰高下則人事修然非巧算不能解故特精乎算凡數過百億則持籌者苦茫昧君卽屈指高倡曰若干算持籌者必往復詳核曰若干算如君言蓋君算沙等恒河亦不持籌也澤昔經毘陵恒宿君肆之別齋君每犯星起服浣濯衣儼坐容

止清肅。子若弟雁行侍。稍通悅。卽斥。友朋造語皆唯謹。心甚異之。及處里門。聞族嬖待君舉火者。手指數百。而君不特無德色。人偶詢及。輒引愧自咎。恒若不慊。嗟乎。明算科不講久矣。自司農司空之屬。不能舉其籌。而奸吏日以文巧變亂射利。君之算乃有天授。不得爲在官。用以市隱終。可嘆也已。君由太學生捐輸。議敘通判銜。加二級。封奉政大夫。以道光九年六月十五日卒。壽八十。配鄭氏。繼配項氏。陸氏。子一。太學生國屏。先卒。女九。孫一。曾佑。以 年 月葬於 山 原。銘曰。其營拮据。其施萹餘。九族待其餽。宜其考終于堂。而哭弔者塞路隅也。

通政司副使顧公墓志銘

公諱蕤。字希翰。一字吳羹。號南雅。其先世自江甯遷吳縣。有貞孝先生名國本者。載吳縣祀典。爲公五世祖。曾祖漸。考授州同知。祖階。升國學生。考應昌。國學生。俱贈中議大夫。妣汪氏。贈太淑人。公中嘉慶七年進士。官編修。十三年充會試同考官。十七年

御試翰詹。公名列一等。擢翰林院侍讀。是年放雲南學政。廿五年授日講官。秋九月擢侍講學士。十一月上疏不稱。

和仁良道集 卷八
旨降編修。道光九年擢右中允，擢侍讀，十年擢侍講學士，十一年擢通政司副使，十二年五月卒。春秋六十有八。公爲詞臣儒官，凡三十餘年，文學動天下，而結主知崇物望，實以奏疏顯，其督學滇也，道河南，以風聞墨吏奸民入告，嘉慶十八年，聞逆匪林清變，疏稱中禁嚴密，若輩敢闖入肆猖獗，則圓明園距都城遠，尤宜備其擢學士也。適值

仁宗升遐後，疏稱方今時勢所急，惟崇君德正人心，飭官方三者爲尤要，今

上召見，凡

稱所言都是者三，其復遷學士也，疏稱西域逆回滋擾，不難鋤，隱於目前，而難弭禍於日後，欲請於喀什噶爾添重兵，控制安集延，俾回人不敢窺伺，且其地密邇英吉沙爾葉爾羌，又東南爲和闐，皆有水草可耕牧，宜募民屯田，以備戰守，更請

慎簡大僚，無分滿漢，務得讀書識大體者任之，以廉靜寡欲通達事理者佐之，其遷通政司副使也，適湖南北江南江西浙江皆大水，疏稱飢民與鹽梟糾合，易生事，鹽梟不盡去，終爲巨患，緩治之則養禍深，急治之則召禍速，故欲禁其妄行，必先謀其生路，復請變通鹽法，聽

民挾貲趨產鹽地收買隨時納課收課之後卽不必問其所往俟鹽產盛丁力紆卽令課歸丁不限疆域二疏俱留中公課士嚴而恩簾閣據几口講手畫懇懇忘倦必其人領悟乃已滇士翹穎者多出其門來京輦者多就公問業或就公廬止舍凡四方士經指授者皆砥躬礪行有文學能自立而公文壇老尊宿之譽日益四馳知與不知皆欲乞書畫以自飾爲詩文師大蘇賦駢體俱師唐宋書由歐陽率更入晚乃倣褚登善間亦作墨蹟嗚呼卽所造就已必傳無疑而公所學深醇實能通政教之源以生平所讀書反諸身驗諸事爲當世拯溺於

於
掇焚之具加以忠愛惓摯急公忘已有所見聞必獻之
當寧或冀一行卒也屢荷
褒擢駸駸乎且大用而公衰病不能待矣史稱陸宣公
言本仁義炳炳如丹如公其庶幾乎配汪氏贈淑人以
其妹爲繼室封淑人子剛會殤以猶子條曾爲嗣女二
長適吳慶華次幼以 年 月 日葬公於 縣 山
之原銘曰

弋名者鳴其利私其實也絢名者鳴其名沾其直也倦
懷于君國近不啗遠不噍不叩而必鳴其言夷且貞請

以觀先生。

兵部尚書王公墓志銘

道光八年平西域功成

皇帝臨午門受俘兵部尚書以組縛逆酋生獻闕下萬眾爭覩驚歎而青陽王公適掌兵部禮成得越等褒賞公供職益虔久不懈

上亦倚畀不輕改他職任兵部尚書凡十六年道光十七年正月薨於位

天子震悼

詔以清勤端謹克盡厥職褒之

賜祭葬如禮子元榜乃以公狀屬恩澤爲之銘用不敢辭公諱宗誠字中孚又字蓮府青陽王文僖公子也母阮太夫人以乾隆戊申年中順天鄉試舉人庚戌成進士

賜及第第三人授編修歷任禮部侍郎署工部侍郎工部尚書終兵部尚書 誥授光祿大夫 經筵講官

賜紫禁城騎馬當

純皇帝

睿皇帝時嘗屢爲雲南四川陝甘省鄉試主考官會試同考官及文武會試總裁於河南山東江西皆久任學

和伯直集卷八
政及

今上卽位時閱殿試四朝考散館卷凡數科門下士
旣多貴顯矣而公又少年早取科第文僖公官禮部侍
郎公已爲侍講學士同扈

蹕東巡

睿皇帝幸翰林苑父子同席

賜宴

和詩

純皇帝實錄成公以詹事爲纂脩

賜宴禮部而文僖公官尙書爲主席後文僖公以年引

退公又相繼入直

上書房

奎章珍器

賞賜重疊其一家父子極文臣眷顧之厚蓋同時所無
雖

睿皇帝亦嘉歎其兩世知遇忠謹自將時發

天音而垂

清問也而公謙牧自處接同官及舊嫻疏友寒峻後輩
皆自居敵以下不敢與鈞禮後進見公或避去不敢當
公之謙挹自少至老未嘗一出言一舉足失先於人任

學政優禮愛士然遇奸弊事必發抉不稍受顏面留根
蔓居京師其宅當冠蓋衝衢車轍皆過不留無謁以私
者其嚴介不苟如是而人皆習其和而忘其峻昔班固
以道德之士皆出於史官知秉要執本清虛以自守卑
弱以自持合於易之嗛嗛一嗛而四益者此特公之跡
耳恩澤自通籍時卽受知文僖公與公至款曲每以禮
謁文僖公公必衣冠侍文僖公卽正容悟物之萬石君
也而公則舉策數馬之太僕矣自其學以孝謹著世躋
高顯凡鄉里稱篤行者鮮不以名父子爲首稱焉其他
嘉言善行施乎家及乎朋友故舊尤人所易知者不具

載也公生於乾隆二十九年四月二十六日薨於道光
十七年正月十二日年七十有四配江天人繼配翁夫
人大興翁學士方綱女皆先公卒子元林廕戶部主事
及三子元栻太學生四子元琛皆早卒今官刑部員外
郎者爲次子元榜女三適上海趙榮貴州邱煌上元董
斯廣以某年月日葬公於某鄉某原銘曰

九乳垂天作鎮青陽歸神於公父子正卿公逢福世粥
粥日晦植棟如林不私一士高門峻城奸莫敢攀惟其
和光不怨而慚用承天寵保世禔躬哀榮之典以奠幽
宮

吳篁洲遷葬志

君諱鎔字篁洲安徽歙縣人曾祖尙選祖文玉父煒光祿寺少卿乾隆朝官御史直聲震朝野君以名父子工詞賦應戊申科

召試

賜舉人屢試不得官以平山縣教諭終寄籍京師歿葬永定門外翟家莊子贊瀛操履極謹飭溺苦于學飢寒齋志以歿無嗣君門弟子鄭上舍復光痛君祀之將斬也謀于同里諸君醵錢若干以道光十四年十月十二日遷君柩及配蔣妾某柩凡三千石榴莊歙義園俾祭

殊躬

掃無闕時上舍適有西河之慟抑哀制淚奔走數日乃定計嗚呼俗益衰薄有子孫懋置其祖若父放不祀而餒其鬼者上舍乃門弟子獨惓惓于塾師而爲之謀永久之祀而同里諸君推友誼以及其所尊事皆激于義可爲世風勸且也乾隆間倡建今歙館者卽光祿公也其子孫之流寓者乃托于義園以食抑何不幸哉雖然使上舍無此舉則光祿不享爲善之報矣今門弟子一倡而會葬者響應皆詩書之緒所行抑何幸哉

汪君別傳

汪君炯字士光號春齋歙人系出唐越國公華後曾祖

景冕有醇德婺源江經師永爲立生傳稱其孝友睦嫻任恤祖泰安養志潔身秀水鄭贊善虎文稱爲隱德君子父孝漪爲父吮疽以孝聞君承三世舊德益自淬厲爲端人事繼母以孝矧嫺黨以惠澤躬以詩書凡相知契有喪葬嫁娶不備禮者皆伙成之乾隆丁未甲寅壬戌年鄉里饑發粟減直全活無筭家廟祖塋但有修葺皆傾橐計不下萬金行賈之暇輒手一編尤喜與文士接立文社約並捐貲爲應舉者助嘗謂人不自言不俟人請不責人報然受金者輒稱道不置居恆告其子曰吾曾祖明若公得江先生之傳而傳吾感慕江先生故自號曰脊齋子孫其勿諉也卒年六十有五子三時育有時譽

論曰假人不德不責食人不使不役親戚愛之眾人善之所謂隱德君子也昔文范先生以三世名德著況四世乎吾鄉多隱德其子孫或達或否然達者或遽謝而不達者終亦必達且曼羨也吾於汪氏卜之

湖南提督軍門楊君繼室龍夫人墓誌銘

夫人姓龍氏四川成都府華陽縣人曾祖某祖某父廷泰乾隆辛酉科舉人官至廣東佛山同知夫人年廿二歸軍門時軍門已貴顯爲總兵夫人幼讀書洞曉大義

才果識偉柔而能強温淑而敏斷與軍門愛敬無比嘉慶十一年春軍門以寧陝鎮總兵攝固原提督夫人留寧陝署秋鎮所轄兵叛戕攝總兵某及中軍遊擊等先是額兵六千名例月給米折銀三錢遭匪賊蹂躪物值益昂所領不給食軍門白經畧某具疏申請部議權加二錢俟三載後再定議及是執事者停支待報兵忍饑兩月有叛意攝總兵某不善撫以威裁之故有是變時七月辛亥也有聞叛而請夫人行者夫人曰不可若我出而兵叛是知賊情也人其謂我何至夕叛者蠶起焚廨舍劫軍民在官眷屬暨民婦女皆驚竄依夫人爲逃

死藪時未叛者譁於內曰夫人勿死我輩受主帥恩賊入當以死拒脫不敵主帥歸見我輩屍見我輩心已叛者譁於外曰夫人勿驚我輩受主帥恩今迫而叛不與夫人夫人勿驚卽仇怨有避夫人側者亦不報也夫人端坐後堂戒奴婢曰死生有命敢號泣者懲之嚮明叛衆叩閣請謁避難者皆繞夫人哭乞勿納夫人曰愚哉若輩欲入卽入孰能禦之請見則見何懼爲命啓門叛首數十人手血淋漓環伏堂下痛哭曰我輩罪大惡極將欲竄身山谷緩須臾死恐去後有驚及夫人者求夫人行夫人大聲謂曰若輩雖戕官爲首者洵不可追於

多人何尤。主帥旦夕歸。且爲若輩白其事於朝。非盡殲也。可各罷歸伍。不然斬我首去。衆曰。我輩血誓同死。生能聚不能散。乃昇輿以俟。夫人將升輿。避難者千數百人。齊慟曰。我輩死矣。夫人復諭叛衆。此總總者須隨我出。毋傷殘。衆皆唯唯。於是出婢子衣履。與在官眷屬結束先行。乃肩輿殿其後。出署。衆復請曰。昨宵廳城亦同時破。衆掠未歸。歸卽傳來立隊。夫人曰。止。何等狂悖。而猶循此規制耶。在此者亦毋張皇。恐多人驚。衆復唯唯。送至澗溝。痛哭而返。癸丑。夫人抵興安。越十有四日。公子承注生。會軍門自固原策單騎馳千二百里入叛軍。

收降撫逸。籠束歸伍。乃誅其尤凶橫者。而衆情汹汹。有悔降意。於是叛首蒲大方等請於軍門。往迎夫人。以測軍門心。軍門不介一奴。許其咸往。夫人冒雪抱公子。泰然登程。蒲大方王奉口角毆夫人止之。至漢陰廳。夫人踞坐。使左右鞭蒲大方四十。械而行者三日。始釋之。見軍門。絕不言。尋羣帥官屬來賀夫人。以其事詢軍門。且偵叛衆意。軍門乃問夫人。所以不告之故。夫人曰。知而不言。是廢法也。告而加誅。法無重科。爲妾謝衆官。妾不見徹。不敢發。發而衆情貼伏。何問爲。衆官皆嘆服而退。軍門以卒叛。故戍伊犁。尋赦歸。攜夫人還里。侍某太夫。

此處元副

人養蓋自夫人歸後頻年多故甫得謁太夫人太夫人風緩不能言手索頤指惟夫人會其意日夕在側太夫人喜見於色幾忘所苦亡何軍門復起鎮廣東奉太夫人行夫人從軍門移鎮陝西甫之官而太夫人卒夫人素善病至是益困然偕軍門返里門力疾營葬備盡哀禮居恒謂軍門曰方寸靜潔則理勝欲念慮牽繫則欲勝理人生最忌情流爲欲當軍門撫叛卒時自謂功足以贖過而夫人謂曰君必赴伊犁當別經年顧屢立奇績不久卽還耳卒如夫人言嗚呼若夫人者可謂明智矣夫人教子極嚴善鼓雅琴工畫蘭時時爲之不倦以

道光五年十一月廿五日薨於湖南提督署之內寢年四十有三 封一品夫人子一承注 恩廕一品監

生娶福建按察使蘇公兆登女女一字原任陝西華州知州劉君某之子宗浩孫一恩棣以是年某月某日葬於某縣之某原空其左方爲它日合窆計則公子承注當夫人綿悒時度其意而請之禮也銘曰

猗歟夫人識力堅定相厥夫子勸勉以正作嬪之初旣榮旣都鳳車翟衣龍節虎符夫子好文對講師律心兵不擾乃築鐵室主帥遠適叛軍一嗥男走女呼環城動搖主帥有恩夫人贊之欲語叛軍麾以散之叛徒求謁

夫人踞見責以大義示以不變攘攘沙蟲爭昇魚軒夫人叱之噤不敢言提嬰挈姆依夫人所翼之嫗之遂脫禍罟其時夫人孕玉將產無驚無恐竟得雛贊主帥亟歸招降叛軍叛軍疑之請迎夫人叛酋忽門若門兩虎夫人鞭之若縛兩鼠帥謫帥還乃移歲陰有姑白頭風緩不斟攜手歸覲載色載笑姑意甫動夫人以告夫人有子賢而多能教督不休大愛似憎娛此泰平夫黻妻佩無作君父能治內外生犀繞帳鼓琴終夕曲罷寫蘭華葉盡碧媵曜忽隕將星蒼涼幸卽珂里一舟可航靈風灑灑瘞此明月女丈夫碣過者無忽

先母項太恭人事略

母諱 字玉書歙縣人父雲騎公際會母程宜人項固歛巨戴雲騎公任俠負逸氣能書畫騎射與我先大夫朝議公爲中表館先大父於家課子若弟時先大夫學士公童年絕穎異誦十三經若流雲騎公奇之母讀書內塾亦絕穎異以歲時伏臘謁先大父道勝常進退合度若成人先大父亦奇之婚議遂定先大父治家謹肅先大母吳太恭人率子婦承事若嚴君寢門內不聞警歎聲兒啼聲我母年十八來歸性至敬慎操作尤勤力先大夫文名日益益課試屢不第先大父望愈切先大

夫固泊於名，而懼無以成親志也。每報罷，輒歎歎不自勝。母始勸慰，繼則相與飲泣，遂成心疾幾殆。先大夫官翰林，倅直內廷，母佐內政，凡十數年，攻苦食淡，無異未仕時。逮先大夫奉

命視學山左也，母喜曰：「夫子以二老人睽離，故恒欲解組歸，今遂迎養志矣。」孰意抵山左，任甫七日，而先大夫遽見背，母痛絕。時叔父儒林公在任所，經紀含斂，百方喻譬，母懼以一死益戚堂上心也。度堂上聞此，耗必不支，必覲堂上，乃徇庶無憾，遂扶柩挈孤，間關旋里門。先大母一見恩澤，涕下不可止。先大父復喻譬母數四。

母乃事先大父母，愈敬慎，操作愈勤力。先大母憐之，因勞曰：「爾處官舍十餘年，尙能親饋爨，可謂賢矣。然我念爾若是，輒痛兒甚。兒幸有子，子賢不肖不可知，但使我見兒勝其父之衣，則我心釋然矣。」恩澤晝持束書侍先大父側，夜則侍母側。母篝鐙督恩澤讀，恩澤弱且鈍，吻躁口苦，猶未成誦。母且泣且口授，向明必背誦，無譌。乃使詣先大父所，恩澤年十五入泮，先大父尙在。年二十舉於鄉，年二十七成進士，官編修。先大母尙在，至是先大母謂母曰：「汝撫孤事已就，兒出身事方起，教不可一日弛也。」先大母見背，後三年，恩澤奉母官京師，及奉使

於外皆迎養。母教責尤嚴。常曰。爾屢奉外使。我豈不悅。然奉使以廉爲體。以明爲用。汝何能明。惟廉則生明。若不廉則負。

聖恩悖先人德。雖奉養極華盛。我不歆也。恩澤奉外使。凡六年。母食不重味。躬服澣濯。且晝夜兢惕。惟恐恩澤或墜於過差。嗚乎痛哉。母中歲頻厄。所冀幸者一弱子耳。未成立則憂。未學則憂。未仕則憂。及能粗給供養。而來日又苦短也。況外迫公事。則定省缺。久膺幽憂。則疾頻。求從容笑語于燕閒時。蓋亦不數數覩也。嗚乎痛哉。母事先大父母極孝。記先大父病嗽。上氣疾。母治饌。

必使與方藥無悖。及病革。晝夜不敢休。歿後哀毀盡禮。先大母病風緩。神志恍惚。卧榻凡二稔。母時年過六十。晝夜侍旁。潔飲饌。浣廁。衣不解帶者亦二稔。及歿。撫棺一慟。齒無故自墮者二。承兄叔娣姒以和。御下公以寬。生平無疾言遽色。聞人有阨。若身受。戚族稱貸。雖典質勿吝。是非善惡了然。而不欲明辨。讀書通大義。幼所習者。至老背誦若流。尤好岐黃書。辨寒熱虛實。雖專家不能奪也。常誨恩澤曰。爾務泛覽。而寡要。若力行仁恕。則所業進矣。又舉漢劉寬傳相示。蓋以恩澤持公事。過弁急也。嗚乎痛哉。以恩澤蠢愚。而內不拂于家。外不戾。

程侍郎遺集卷九
于官徒以有母在也。今且失母，知不免于小人之歸矣。恩澤生四十又五年，自母視之猶孩提也。寒暑飢渴，日必三四詔焉。今噢咻之聲猶尚在耳，而望其曠已臯如也。嗚乎痛哉！慈孝如我母，明智如我母，而不得食子之報，侍養無狀，其又奚道。嗚乎痛哉！母以道光九年二月十六日卒，得年七十有五。子一恩澤，孫一德威，以先大夫官學士封恭人，以恩澤官祭酒晉太恭人。

程侍郎遺集初編卷九

祭錢東生夫子文

於戲。亶亶夫子，敏穎超特。文而又儒，學統萬緒。以蓄千智，未竟一專。旣泊仕宦，復廉取名。用晦而愚，由壯逮老。彌衰彌健，半苑半枯。豫尅亡日，經畫含斂。招詢友徒，豈有所赴。都錄雲台，委羽遮須。音徽未沫，春蘭秋菊。請陳其麤，夫子才捷。文不加點，成誦借書。分占口授，十手擊脫。乞姑徐徐，千詩百賦。子唾而就，眾喘而吁。博關典籍，尤邃鄭孔。以經爲郭，情律兒實。芝菌虎龍，灸景鍼芻。閔廓深遠，百氏環橐。九能大夫，子嘗稱言。經生偉人。

昭代所儲、蒼萃著述、錄采梗概、以遺南狐、學校壇宇、治課常變、鈔析而臚、子又稱言、文蔽也、雜詩蔽也、誣、和易其體、篤雅其節、黼黻其祛、圭陰江左、謝華啟秀、鎔一鞠、醞欲剝橫流、自守宗派、以還古初、子惠淵懿、大直若訕、處愠以愉、子識卓絕、見微知著、能斷且謀、孝乎惟孝、倦懷故舊、不遺媯呱、弗籍貴胄、厯官清要、屢持文樞、沛然其名、上徹

帝所、遠波扶餘、使尙待用、秉經達權、可公可孤、憶受知始、賞臚顏裕、詡詒癡符、風雪清華、鎿火夜集、輒言姁姁、情恕理遣、標然靜雲、覆四座隅、十有八載、半以睽離、迕以閼疏、文藝寸長、差可表襮、子謹而譽、憂患疾痛、無可告訴、子聞而呼、旣畔函丈、昔昔夢見、猶憑竈觚、歸拜牀下、秋疾來宅、再革再蘇、不計生歿、遑恤貴富、紛紛弃絮、君子所息、全歸爲亟、不墮岐途、遺草一篋、枕衾所授、弃之瓠壺、後死之責、剗剗流布、且鉛且朱、龍吉化矣、獲人亡矣、若津失柎、尊酒旣奠、靈風颯然、心光如珠、小文譎劣、捧土益岱、但形其劬、有道之碑、鄭鄉之業、則俟大巫、哀哉尙饗

祭宋芷灣先生文

於戲、太白一去、大蘇不來、天憫詩境、夷於委灰、公腹奇

氣如憑高臺西摘落月東浴蓬萊化爲明霞焜煌九垓
 尋子詩境非蘇非李古與我合我不古儼超然之神萬
 彙其始猊鬥麟觸霹靂操箏捷若天馬粲若媚子秋館
 桂魄春筵綺花醇耐千觴老手八叉草聖詩王公侯咤
 嗟今日堊牆明日籠紗零縑碎楮傳走天涯爲名翰林
 良二千石才逸遇蹇卅五通籍使黔使蜀文路大闢滇
 官一紀寂寞懷璧觀察一稔卽削塵跡海內知己靡不
 悼惜歎聲所到遂成今昔澤入芸館學宮體文教之誨
 之伊子獨勤論符而癡滄蘭弗芬人覽叱叱子覽欣欣
 謂我古賦蔚跂不羣袖稿款客高吟入雲遂令走卒來

鑿大軍人雅重子信子所云子不惜譽溢其寸分我喜

且慚歸求典墳鄧林維流何處置斤子宦萬里我返鄉

國尺帛不達夢想卽得秋遇如約子北我北嘉慶戊寅年公入都

澤亦入都參軍之堂元龍之側之渙自倡子聽嘿嘿時鮑覺生先生

設燕招澤趨陪座有陳伯雲王楷堂兩先生楷堂大聲歌近作公嘿爾而聽燭闌尊冷珠斗

已仄送子上車微聞太息前此三年我使黔中子時在

滇音耗偶通子過且蘭貴陽省城訪我所宮我詢子詩垂老

愈雄我乞子書子曰遽匆我敏子政子謝無功我偵滇

吏述子之風灣甸有酋嘯聚羣凶肝人爲舖喋血成虹

武弁翼之利其賅賓大吏畏之恐衅邊烽子決殺之苦

無尺鋒上掣其肘旁縛厥躬子憤成疾勞心忡忡急練
鄉兵讐酋以弓卒剽其頭以祭沙蟲曾否若是願聞始
終子曰罷休此何足庸惟子宦滇美政够夥士歌民頌
溢于道左小飲一霎欲問不果會有玉管奚待瑣瑣我
移沅權子艤楚舸同居鶉尾乃逃蹠坐轉粟天漢風雨
坎坷歸乃疲茶四末竄情遂令恒幹爲疾所禍跡子生
平大才觥觥文能著書武能將兵未罄所以詩文鳴
不撫所仕書日有名神劍夫禱三軍不驚偶露其銍萬
夫失爭子詩子書自視甚輕棄其胥餘後學所羹頎碩
其貌蹙輔而笑穎邁其性言簡以妙似狂似慤能忠能
孝都不經意動中窾要天懷散朗或飲或嘯一錢不選
萬卷獨校我登子堂未見奧窔多別少覲遠邇相照曾
不邂逅轉賀爲弔西愚傍徨如夜失曜江山文藻異代
同調遠致絮酒願子速醕靈遊靈歸不閔嶺嶠於戲尙
饗

祭家也園先生文

於戲有古豪傑起於新安天昌乃名不撫乃官少而通
籍老而爲客黃金山傾所至削跡早抱大志恥卑狹流
文章事功欲偃滄洲當其赴前不暇量力眾詫而驚自
顧甚得瑰意琦行珍裘玉輿神仙中人出入閒都獻賦

爲郎遂入樞密兩轉銓署屢讞刑律英蕩所指曾雪厄
冤亮節清風卻賄與援熊湘戎事枕戈磨盾護麟符旋
左虎右隼尋其才望指顧九遷忽漫投簪卅九歸田進
避權相成我高潔退澣厠牖二老歡悅封公雄卓其施
恢恢公纘厥緒厦千萬開銅陵金穴非家所有揮霍在
卽違計其後窮阨俛俛來敏公門屢貸復貸公顏益溫
生死患難錢通可轉論公所捄積無量善尤愛端士與
羣雅材旣贍其身復廣其栽公性華逸詞翰俱妙壺觴
一巡絲管竝叫意錢博塞反雉掬魚脫手忘懷舉手笑
呼若公若侯皆金石友郎潛京輦四海趨走公不慕勢

人爲名高息影江湖冠蓋滔滔筵芳友萃筵冷友散再
衰再盛哀樂參半晚學禽向與陶朱公逋負益多食客
益充吳楚遊倦遂窺海鏡粵都奇麗雅合公性瘴天如
瘴匪衰病宜淹忽長逝愴矣其悲我祖高足我父至契
我生公賀宦邸連砌我戲鳩車公授我書公賙我家公
黼我裾乾蔭旣失奉母南返我祖悒悒公語款款祖庭
又殂母憐其孤公曰勿憂此子易扶我年十七卽學公
宇與公仲子鉛槧樽俎我文無范公誠其馳斂而運鋒
公歎其奇我屢計偕公客吳會不第公愕旣第公快我
素食貧奔走阻艱公泣公歌天涯水干別或數載聚不

三日念深緣淺心勞夢拙昭陽協洽我使且蘭逢公新
鄭大河漫漫玉骨鶴聳雙眸鏡徹語多恒昔賜老愈熱
夜半涕下曉來北南人語喧豗四目眈眈我黔而湘公
楚而粵風聽多阻書問亦闕公之貺我山海難量豈不
思報抔土太行金河以南別竟永訣五嶺以北苦失消
息出處大節公無少虧不附勢要而戀庭闈使公徇祿
久躋大府定建宏偉龍文虎武公施旣博不責人酬酬
者寥寥天道悠悠慈仁義勇筆不勝紀散在人口著必
良史公有三哲屢諫公歸仲也最豪博辨知幾公志未
伸當有達者我拭此目以俟方雅絮酒磨鏡未能親行
哭寢有淚激爲楚聲光孝鑒師華首葛老求公於是公
跡未掃於戲尙饗

祭葆逸舟觀察文

於戲國隕良士家失長者問天茫茫導以猶子從以懿
况君丁厥殃程書旁午讞牘未了燭難心益仲兄大賢
痛失白眉老淚萬行黔妻有妻伯道無兒後塵痠傷君
以孝廉由國學師爲禮曹郎觀察東南亦習皋蘇亦宗
研桑際鹽法倣

帝命置吏改弦夏張鋒車星使反覆詰難君言甚詳鞭
笞旣得錢流地上利歸海王

帝嘉君賢移節歸綏長城巨防往者辛卯歲乃大水漂
朱雀航沈竈產鼃萬民汹汹牽船望洋君勸輸粟彌夜
達旦舌焦唇創抑鴻澹災誓波請命民用乂康改秋試
期士得平土不鑿河塘凡此美政大府俞之君實紀綱
我爲寓公見逐波臣舉室倉皇君儼華墅安我驚魂度
我巾箱旅客多戚君左右我使登達莊我性狷介曲意
相喻婉辭而減紅鄂破春素月行秋山明水蒼君歌我
呼連輿接茵窮花竹鄉一味之甘十漿之饋必分而嘗
送我北去天酸然雨離雲滿觴睽背二稔君來
覲宸五柞長楊直廬岑寂溫酒相勞有鳴寒螿君顏益

豐漆髯飄蕭甚口琅琅重話舊遊萍散蓬轉感時悽愴
謂君邊寄建樹必異克柔克剛君言南中風物清飭每
飯不忘西行索居黑水風急大青雪荒計抵秀容卽攝
廉使其真未亾何來惡耗何疾殞碎何藥披猖走告諸
爰諸爰詫疑瞿瞿悵悵君性篤摯情慤德滿薰然善良
世宦熏灼尤所吐棄藐以迭邊訟庭花飛忽致雙鶴環
君舞鴉周妻何肉俱可屏卻矧日冕裳揣其襟抱清超
曠遠宜壽久長視官甚輕必能宏濟爲儉歲梁胡天不
愁折婁貞公悼盛孝章拙篆帖楹君所欣賞焚之陰堂
小文舛陋庶無愧辭聊申闡彰數耶命耶靈其自知無

任涕滂於戲尚饗

○祭外姑劉太君童太夫人文

於戲痛哉。二日不見。疾來如風。不語不食。僵仆籠東。胸蓄萬言。口無一字。百呼弗荅。瞠目閣淚。喉森葦葶。半體遂枯。心光熒熒。乍有乍無。投藥不入。抵壺而嘆。行就長夜。何術使旦。遇否身泰。節苦境旨。反覆不訓。孰測其理。請述母德。孝於病姑。姑臥三載。昔昔爲奴。以手掬穢。以口哺糜。頰吐卽膺。頤指斯知。姑曰孝哉。有婦若此。願爾女貴。得壻如子。先是外舅。抱疴不斟。金翦截膚。石銚煎心。肉徇九原。痕留一割。若有所待。隱忍生活。時女未睟。

未睟而孤。卻顧女君。亦腹文珠。入地求亾。祝天得雄。兩念交馳。魂夢洵洵。子羸女壯。母意悵惘。均乳而食。冀子速長。嬌穉多眚。幾赴殤宮。就溼推漣。保此阨窮。家祀薦時。女君所治。佐潔蘋蘩。季蘭尸之。千劬萬辛。歷廿餘載。自後追思。若涉淵海。男賦綠衣。旣授室矣。女卜鳳皇。迨其吉矣。孰可壻者。母心傍徨。擇到黔婁。不棄侯光。新婦來歸。我母悅喜。謂秉母教。婉孌循禮。母與我母。雅故旣久。申以媿戚。益相人偶。槐榆橘柚。合爲一家。同上錦車。共走天涯。黔雲漏雨。楚風多暑。我母慰安。恐母意苦。我母數疾。殞殒不支。婦力弗給。母能維持。我母感母。若姊

涕然朝怡夕嬰若蛩歷焉我母綿悒呼母絮語我兒我
婦卿子卿女慈暉徂謝阻艱南行我呬我吡母止我聲
我毀我蹶我鬱我戚宛轉相我老淚潛滴母家雁門風
高折弦不耐溽蒸愁縛痰纏亦旣北還一屋爲笑後堂
置酒子舞壻蹈玉雪諸孫或戲或訶梨栗繞牀軟語歡
和愧非韋皋謬荷嘉譽亦效稚恭騎馬稱遽健婦夫牛
直廬雙栖偶迓母軒藻沼桃蹊舊患漸痊常膳載進壻
階驟轉母意深慶尺五城南連宇接茆往來憧憧如一
團瓢經緯周緻庀我家政先人後己革裘崇正雞鳴膈
膊烏尾畢逋簪短帶長掖揭且瘠鏘籥如珮筐篋瓌瓌
施杖安松必得其所識惟卓犖性復卹賜撤環拔釵以
惠惇嫻昏黃燈火時話曩昔金張門第貂珥盈席外舅
雅性能績能琴母通弈旨亦解弦音投枰棄軫舊跡如
掃息古井波種拔心草施藥拯急已疾曷瘳刀圭不聊
天道悠悠有孝者子事庶如嫡知母乳味悲母瘁力晝
夜不眠求醫籲天壻惶女癡繞柱而旋秋孟十九斜月
在屋紈如二鼓婦孺咸哭年齒未耆旌封尙虛德盛運
促慶遺子帑事起倉卒我懷怳惚謂母尙存誤敬母闕
母憐孤稚安忍棄捐西風觸魂當亦潛然搆疴彌酷繫
思彌永來日大難不盡哀哽於戲痛哉尙饗

祭吳蘭雪先生文

於戲有美一人起廬鄱東以詩而窮以詩而通冊載大名海內拜風萃古今才擷其妙空清若浴碧冶若寢紅能剛能柔且逸且雄雲錦鳳羅天巧國工綺歲高步秀矚玉頰歡場醉筆驕花寵葉解佩漢神躡柳佳俠連手縈繞願執巾箠上公通侯以禮爲羅入拜後堂出聯玉珂華天雪宵奇峯詭波眾摹難工獨聆君誥神畫僧繇曼聲韓娥一座盡傾萬本萬螺或寫宮紈或織鈿窠零句碎章口熟巖阿曰竝世生柰此才何亦登遴選亦舉廉孝薇省端牘露門司教性非坦率遇每瑁璪超超阿

龍豈半袁豹斯人蕉萃識者私悼君懷豁如意不戀嫪其境彌窘其名益噪中山弟子擁書請造扶餘使臣聽詩踞竈聲譽文繡焉可戶告沛然有餘如響斯報懿哉前賢壇坫稱尊大波小瀾闢學者門屣屣其間君聞緒言同調蘭朋摩宰鯨鯢指窮爲薪似續斯文及君牧邊投老荒屯四海墨雨凝爲鬱雲槃敦蕭寥非君樂聞我齒廿餘邂逅長者見我塗抹詡以揚馬詫我博辨譏以終賈我詩舛律萬言灑灑拜君指擿裁僞親雅精心銳力奚事侈哆杜韓難真漢魏易假曰才學識獨具陶冶我名未顯君乃大評袖我拙草投人夜珠強聒使聞或

說文屣屣也
屣屣也
屣屣也
相歸也

否或俞。我踐華近。託於屬車。君窺燕閒。自佩一壺。詠
醉歌。月墮星疏。我感白風。君助我吟。我購鸞膠。君貺以
瑜。我時奉母。摳衣趨隅。君遣魚軒。蕙言姁姁。珍膳甯餽。
必薦鯉鳧。我卽使黔。客香棠館。曾書寓君。吾見亦罕。君
後收此。柯古香暝。對花豔豔。得句款款。荅曰築巢。以寄
漫嬾。由黔使湘。由湘北返。別君六載。共歎晚晚。慈暉隕
矣。叫天莫回。扶引南舟。炎暑怒雷。君送我行。蕭寺夕來。
坐不忍起。語不勝哀。僧揣友情。亦佐嗟唉。冀訂後約。何
年何地。遂成長訣。豈所逆計。庚寅之春。君赴所治。飄拂
吳會。屢遣詩騎。我客白下。命駕未遂。此後五載。若背風

翅。夢旣艱到。書亦眇寄。聞君措施。大有賢聲。千室鳴弦。
百夫得情。文黨設堂。龐參卹嬰。敦厚溫柔。詩教果行。命
不龔黃。壽或聃鏗。陞老益工。弗令吐傾。梅景蓮花。齋返
蓉城。君福清逸。名山幾遍。滌筆匡瀑。大雲罨硯。久宿江
洲。梅月如練。有隨清娛。玉貌盛鬢。郎吟妾繪。淋漓東絹。
惜哉早化。如露如電。昨接手畢。深慨杏塲。一官瓠懸。萬
緒茫茫。我徒依君。曰銀河張。惡耗遞來。謂君坐忘。懷任
彥昇。哭盛孝章。名輩漸稀。詩道其荒。丹旆東發。久斯塞
旂。靈娛或來。垂帶相羊。天末故人。泣奠一觴。君知不知。
憑此心光。爲傳志銘。後死所詳。麤述大招。臨風慨慷。

祭曹文正公文

於戲元老耄嚙夙夜盡瘁心景其淪

帝乃震悼曰腹心賢曰股肱臣前此數日猶奉

尺一翦翦恣恣如何不憇精爽銷微寂無嘖呻月正三

日李將旦南有聲鏗訇公歸上霄朝野皇然失一正人

皋夔之衷灼知惟

聖篤信惟

聖守道不移心無偏曲

特謚曰正伊公學術本末鉅細一主於敬懷繩準鈎執

符明燭亢鋸之柄顧善韜晦不露厓岸莫克窮竟惟

聖答之獻可替否昭躋而諍兒和辭訥不語不辯粹然

雅性惟

聖覺之弗辟嫌怨專抑浮競

明光若禊奉魁承杓十有五年參贊

廟勝縛渠龍沙圖像凌煙簫勺靖矣動合機宜山陬澥

壘練習掌故顛畫清靜大猷炳焉一覽優記至耄彌彊

封章委闔雞次豔如占對不窮

皇心慰旃依之違之左右綏之以壹衡懸無笑嗔迹無

激揚語而能得賢頻頻鷗斯求比求繫望風而還端委

立朝正容悟物中外肅然身仕

三朝徧歷六官相廿三載以文起家以惠濟美以才展
案羣經背誦諸史括記體用攸在篇筆醇雅弗睽時好
聯鼓貫珮最樂商藻齷齪隻字夕炬起改誕章譎觚鬼
瑣回穴謝以不解五典春官十持玉尺金鑄四海方聞
槩人趣公所尙咸入模楷文軌旣正道源所繫以建真
宰惟勤故敏惟儉故廉惟幾故深尤慎操履舉無口過
靡瑕可尋時際
堯舜寵重恩厚鑒此蓋心公益奮厲深援安危思融古
今一言一策未緒未達反還酌斟條宜事比必聿必繹
犯星以齡惟

天聰明惟臣莫及敢竭斐忱綿愒之際猶念朝政誦誦
不禁

溫綸擧申任子增秩公感何若經被覆躬珍玲親體公
潛何若

親臨未臨

天意愴然

遣奠三爵留此耿耿眷顧愈厚思惟莫度歎聲所屆爰
自廷府以馳荒朔日社稷臣百齡何愴九京可作公於
先子結肺附契爲金石盥我辱公知于彼生初先試啼
聲婉孌近親崇重道誼相胥而成不干以私不逢以喜

愜公素情悠悠蒼天栽植之力推置之誠亦旣孟晉曾
不計酬拯土太行師哉師哉桐子謾訑日卽阡傾憶公
溫溫若氣之春百昌咸起去尤見思若燧厚夜若筏困
水生加大傅歿諡文正哀榮極矣靡不撫慟靡不賙禭
自
當宁始功著旗常慶流苗裔神在典祀大文清詩雉雉
麟麟充棟盈几千載而下測公笑兒惟憑故紙椒漿空
奠齊衰不御悲哽曷已靈風滿旗大星如月公其格止
哀哉尙饗

祭曹文正公德配劉太夫人文

於戲文正返真甫祺薦常柰何斗媿冥隨隕光亦有少
室峯積尤亟逐岱雲化距四挾日月穀歲旋哭寢者三
藉謂純終送者曷堪惟我女師婉婉德象以節度息作
嬪丞相爲曹大家爲劉令嫺明月采筆天風佩環節度
偉人母乃馮媛孺染禮教廣聞深見左右文正垂五十
年敬佩有道海內稱賢綠輿在門黃裳之偶大帥竿牘
望而卻走闕觀狐趙山公之如辨才與量識幾燭微詎
特內政修尼井井亦轉風化亦賴戒警先是司農奉九
甸慈春暉益壺大雲覆之母以孫婦逮祖姑事頤指目
潤動輒承志戴星劬劬煩摺織維孝溢邨譽喧傳迄今

我髮倪時隨母拜母繞牀梨桌嬰春消九我母契母歡
若後先傾吐肺附情緒眇絲載乖載合倏哀倏樂我母
前逝母意殊索我娶於金繼室以劉母甥母姪唯母噢
咻絳帳生徒後堂弟子師思母慈涵泳無已受性寬懿
秉心悲勤不貴華膺獨崇誦芬通知大義亦文亦史蘊
才不露愈襍淵嫩金幹玉楨八節九華興慶首行榮顯
莫加蘭時內集屏諺深燕林林蘭玉雍樹負劒族嫺燿
焮羨母福完祝句母福百分一端母曰茂哉細擻錫類
宜勗子姓以紹門地善容仁氣藹如蕙風旁颺曲吹感
及媪童鳳靡鸞鍛中懷茹苦筠心瘁矣豈待淮雨尙憶

昨冬計及崇祠師入賢良母實尸之無成代終賴此朗
識警欬在耳若前日事師未卒窆後母歸乎春水方生
又送靈臚惟子孫曾彌賢彌俊足慰慈望金策玉印念
及小已於真洽時哭奠椒漿靈其鑒之哀哉尙饗

公祭李蘭卿都轉文

於戲鳳集彘華海內文明所過謹諄願聆其聲亦有神
驥力竭猶騁仆於長坂見者哀哽豐遇嗇筭逃哉天聽
夫豈偶然抱道翊聖君如鄴侯如員半千生而慧成幼
卽頤天千詩百賦借書于手文采必霸歎欲萬有掇取
顯第若探筐篋抑然自下不侈形謀厯涉華近鳳閣樞

垣黼藻卿雲懸河筆端益習經史通知時務雷聲淵默
攬轡四顧成君盛名則守思田如搏丸泥指掌方圓以
渠龍骨則稻再熟以典雞次則尸勤讀百鼓統統盜革
而徂萬厦潭潭士晏而儒始是瘴深不覲驄馬父母在
庭瘴亦消冶始是咫聞耳塞目眇良師導源見學海瀾
貿貿提陀精夫媿徒養印自充仁偃禮趨銅鼓應桴鐘
礪錯采陽明再來辰在戌亥問古阿孀陽明再來具開
創功惟天下才展君領聞則權巨關舶艤子徠鏡燭吏
姦決鴻害稼臥隄請命君盡止之弗畝奚病湖波寬緩
堰虹穹然全生澹菑蟲人萬千權臬平亭球荒如火種

稔不齊生計遂左一歲再藝見賦吳都爾則圣土吾能
障湖柰何賦重生金生粟圖始實難試視粵穀政和特
達有過其遷都轉山東借寇潁川平江練湖俟君盤錯
遂羈淮海紛攘六鑿百齡俄頃牙淺弦疾心光如月已
迫消乙君常稱言以古爲師破萬卷書實爲政資朕黨
儒效君此性真先教後刑厥化若神君樂山水驂鸞跨
鶴舉帷清暇觴詠閒作江淮東滙方聞所都偉哉主盟
比韓歐蘇憶同譜歲君甫十八外温內服丰儀俊拔二
十歸娶花月萬篇廿三典試章貢多賢強仕過三如日
方中好作功名圖磨卜熊未聞臥疾遽卽長夜天球中

碎國棟折下翹想舊部哭呂衡州橫江池南溢湘灘流
悲感所集定謀尸祝殤爲貴神上動瑄宿箸作藏山詰
兄哀之身後千秋營魄戀斯椒漿泣奠銀灣側畔靈風
肅然助我三歎哀哉尙饗

大清武德尉四川建昌營守備王君及其子武義
都尉貴州思南營遊擊忠節誄

并序

乾隆三十二年四川建昌營守備王君呈瑞偕守備馬
子健隨遊擊蘇爾相素克津泰入緬責貢以降聞於
朝於是藉武德家獄其孤宗佑又十年遊擊蘇爾相遁
歸白其事於朝曰蘇爾相囚素克津泰縊王呈瑞馬

子健死于江皆不屈也於是官宗佑以完其家實爲武
義君又十八年武義以清江營守備將兵黔楚間當苗
眾始立功尋以都司將兵剿教匪于蜀以遊擊將兵靖
永綏又從征興義苗平之勞績無筭賞賚無筭然寢食
戈刃間凡三年裹創吮血虐以寒暑病殞死不支未嘗
一日休也嘉慶三年七月四日武義在蜀營攻王三槐
于安樂坪大軍失利提督死武義收散卒以寡搏眾身
被數十創力屈伏地北面大呼曰不能報
君恩矣遂卒於陳于是武德以忠節殉于緬其子武義
以忠節殉于蜀前後聞于朝大白于天下嗟呼奉使

貴不辱命降不可也雖不死可也使武德不死與蘇爾
相遁歸雖至今存無益也武義艱于獄勇于陳屢立戰
功富貴而雍容雖白首統戎行可也然觀其戰先士卒
篤病不少懈其心以爲彰前名報國恩出萬死不獲
一生可也夫忠節天之榮名也其父取之其子又取之
奉使臨敵人臣之大端也其父緬頌之其子蜀頌之太
平之時而以忠節著尤不易之遭際也天何厚于王氏
父子哉武德故黔人官于蜀遂家于蜀之西昌武義官
於黔葬於黔復家於黔之思南武義子振基廕雲騎尉
清慎有家法介安化令朱君以文請澤謂兩世忠節宜
誄也其辭曰

武德矯矯握節不屈魂趨金沙心向丹闕萬里孤臣不
求人知忽暴于朝天實爲之孤臣有子不絕如綫拜
恩儋爵臥戈枕劍凡師之捷在義與勇武義一呼兵躍
馬驟首首獲魁積甲嶙峋武義顧之
寵賚又新先登陷陳病困不已生爲國士死乃肖子金
夷重夷有肉若糜血碧蜀天化爲虹霓鬼雄南驚直叩
阿瓦歸來歸來同食方社

卣酒載清豐碑峩峩忠乎孝乎所得孰多朱波獻象岷
絡如井如何琅邪不幸斯幸烏江熊熊掌溪來同忠孝

之廬千古以風

王母朱孺人誄

龍憐之孀未逾半稔而孺人僅三閱月也孫環之寡先喪厥姑而孺人泣三喪以血也任妻之少孤孩在側而孺人若流星之忽也然無子而有子子立而家庇抑何慈且壽也畫室而處瓶口而對靡不禮以節也閨門雍雍內外斬斬族媿悅也曰奚自奉之約而與人則周緯不恤也穀似孝慕

我友王華字石甫

以淚泚筆寫老銀而摧切

也我居聖室未表母德叫蒼天而罔極也

祈晴文

道光十二年六月十九日廣東正考官程恩澤副考官邢福山爲久雨祈晴事齋肅頓首致禱於所過名山大川之神惟貴神膺沈藶之盛典董常羊之巨維卷豐隆於掌握起萍號於呵吹故能沛百昌之沃膏興五土之熾苗今者小暑以後高原旣滋非惟雨之又潤澤之淺已微乎上尺下尺深復逮乎六施七施儻霖霑之不止轉損穀而壞粢非所以體奧苑之仁覆錫富媪之蕃釐也矧使臣者奉

天畀之英蕩併晝夜而載馳歷五都四瀆而不憚險遠

和尙良選集 卷九
且欲度粵嶠而南窺珠海之麋迫有程限不可逶迤頃
行抵河涯之間閱數日而爲積潦所羈縻變小澗成瀟
淪化平涂爲險巖馬十步而九蹶僕前進而退疑廢食
飲而忘寢興會不半程而已茶疲噫嘻乎雲將雨師豈
不屑使臣而爲斯使臣官不足重材不足毗特恐渝薄
海

共主之簡命卽

貴神亦以爲非宜伏願速偃雨旆迅收雲旗消芒晦于
俄頃顯鼂暉與夕晡使臣御風而行晷刻不差納節之
日五善周咨是時觀大穗與長稔亦先後而登京茨則
貴神一舉而兩美備矣使臣當九頓首而謝如天之祺

第二次祈晴文

某等前次祈晴僅告所過名山大川不敢致禱天神以
天神尊貴非大夫所當祈也然春秋之義王人雖微序
於諸侯之上卽行諸侯之事不爲僭茲再禱風神雲神
雷神以達寸悃恭惟天神宰制陰陽迭用柔剛曰雨而
雨曰暘而暘今者二旬不見皎日厥咎常陰厥過流溼
瞻彼大田其患惟潦哀我征人復仆于道懷私爲每此
懷非私瓜時而往瓜摘乃遲使臣之心曾誓河水斯文
未喪宜受帝祉帝祉伊何所助者順霖止潦清乃利于

進伏陰伏雨有干赫曦孰綱維是而令怨咨佻夫雖微
曾拜

帝命惟神聰明有籲必聽

謝開霽文

夏間過宿州值霖霪不止作文祈晴於所過名
山大川之神不三日而開霽茲復過此作文祇

謝焉

翳使者之南邁兮值霖霪之淹旬懼程限之孔迫兮路
坎輾而逡巡乞明神之嘉惠兮叩喬陟與齋淪惟濯靈
之桴應兮發勁飈於九垓耀赫曦之烏羽兮卷水雲之

魚鱗前金蛇而後玉虎兮皆遁藏而不敢伸譬震怒而
忽霽顏兮非神力其孰振喜征蓋之不濡兮快劇驟之
可循爛川涯之媚晴兮斂山翠之久顰幸數日之偶開
兮恐後途之仍屯何明威之廣覆兮隔千里而一均計
自淮甸以達海壖兮無怪雨之或津頃使旋而納節兮
鬯周原之駱駝過符離之古城兮心惓惓於貴神忱止
寸而恩倍尋兮雖巧言其曷陳冀蟲鳴而天聽兮蕤真
香以上申

程侍郎遺集初編卷十

曹太傅相國八十壽文

聖天子御極之十有四載時聖道淳六寓晏然仕歡於
朝農耜於田於時我太傅相國老夫子位台鼎凡二十
二年領樞密凡十有五年而齡躋八豔丹顏而華顛天
下望之如周召公如古彭篯豈不以身繫社稷之身齒
冠中外僚采之先故介福者同辭而冀劭德者彌堅哉
聖天子嘉乃元老訏謨丕績

親灑丹毫

寵以得賢之章

書額書楹祝期頤與康彊

大賚珍異器重衣華金朱煌煌若湛露之滋鄧林赫曦
之耀扶桑宜其奮榮揚輝日引而月長也十月幾望歲
星在畢五老人正中

天使乘雲繞月而來賁乎公之宮南面磬折祇述

天顧之隆公九頓首九命茲益恭捧盈而匆匆自上公
通侯九卿以迄庶官弟子門人莫不觀盛禮而忭寵崇
也酒行樂作或舉觴而言曰自某處公門下見

天使凡三至焉歲在甲戌公六十壽拜

渥恩於逾格實臣工所罕有歲在甲申公壽七旬如初

之禮卽肇今之辰自今以始且屢荷

天之申豈云

三錫而未之前聞哉故語

體兒之隆則

玉瀾繪像

宸章鐫焉

紫閣圖勛

御贊縣焉青花龍尾之道易腰輿以肩焉舉輿服之貴
則翠羽吉光重暈圓焉乘馬吉黃紫纒翩焉其它殊恩
異數玉管不勝編焉盍推致此之繇以詭乎座賢或舉

和伯真遺集 卷一
觴而荅曰公以世祿鼎貴致身清要詩禮之氣益乎廊
廟書誦三篋而不遺一字文約六經而下筆典誥抑誦
觚之詭詞倡和平之雅調用能潤色鴻業概括雄真是
以玉尺凡十一持而五典春官門生遍海內皆酌公之
辭波而不敢溢其瀾至於總錄館裁

史成領

東塾直

西清掌翰苑則扞挾天之藻侍

講筵則聞說經之聲而贊機務之要尤爲

絲言出納之所程是則公之鴻才蓋濯乎銀潢而愈明

也公徧歷六官六官之職皆舉謀謨密勿千端萬緒若
經緯之在杼

皇武旣布干羽屢舞上安下禔各得其所且也公昔以
參知政事未三日而拜真相今也

加太傅崇銜冠公孤之上荷

三朝知遇之恩協百僚多士之望然則公之鴻才偉略
其可度者在守正持重其不可度者則密對與

帝貺也然而智蓋一世材總四海名宰相之才也略也
其本則基乎德公抱忠孝節廉之資以敬儉讓咨爲之
式少性恬退絕權貴之謁長益勤慎勵堅貞之節事無

和仁良道集 卷十
三
喜齋

鉅細一主於敬閭室不欺若對天與聖平一己之好惡以齊人之好惡故有公非公是而無私喜私怒不激不隨一趨一步摧豐機於將萌培元氣於已固能使于于者視端行正來同我蕩平之路也以儉表率非庀一家以讓風世自無人加故實是咨聞善拜嘉仁氣煦言如春在花以是服官垂五十年無纖毫挂於過差尤可異者聰記疆識善斷與謀深自掩抑如被褐反裘卓識遠慮洞微燭幽載其清靜而廟堂旣修惟

聖天子察其單心許其同德

獎以正人覺試之而愈優被之而愈新故

寵眷稠疊不可涯而祿祉履戩以莫不臻也加以耄期守學彌敦攝固不懈以久建九紀以立純德以上登旗翼之壽晉語云惟德厚者能受多福揚子云壽可益乎曰德是則備三達尊膺九五福其爲德之囿乎內教修舉子貴孫賢其爲福之藪乎合座乃舉醕而頌曰古我睿聖武公年九十五猶箴傲於國屬誦志之我補亦有甯川羅侯領三十六曹年百二十猶精爽而不憚勞亦有潞國太師年九十餘尊德樂善雍容玉除願公勳名媿乎潞國壽考齊乎甯川而持盈挹歆則如睿聖武公益益益益也

王子吳鼎匱銘

虎阜寺寶王子鼎。吳乘失載訪者。梗程孟聞自梁子偵。洪季陳仲據几省。古翠欲垢灰未冷。捐灰滌翠吐金景。梁子且詠且詰訂。龍龔攝提斗子柄。陳仲作匱閉深靚。作銘者仲篆者孟。王子有知定首肯。

面東西晷銘

此器剏於齊太守彥槐張大令作構。然自午初至未初無景是一大病因

與吾友鄭浣薌謀而補成之

非鏡非臺器圓靜節綫晝刻晝以鋌欲平其地足仿鼎。可升可降極度等東表東景西西景日中無景何以省。乃規缺月弇其頂頂有小竅透光圓方中方睨定俄頃。

槐杵所遺衷而整

爲張石洲篆薦雷書屋額并系以銘

游雷之游鯽不載游至作薦干所會通震以坎皆詰再。恐思修省乃得貝文孫識之祖誥誠

晉靖王寶賢堂硯贊爲張石洲作

辨厥首印不辨厥足。矜率然蟠朽筮以齡。身流水有光。宜受別墨之黔。吁食其墨則贊三兆。吐其墨則揆聯藻。無涕黃之袂。而有艸元之擾。清事賢邸弄以密。銀河張宿寶其出。甲子五光今再見天日。

祁淳甫食筍齋圖記

南湖之北，樂泉之西，有食筍齋焉。不由旬廣，而幽徑窈窕，無辨華飾，而洞室燦閭，雲歎西東，山影黜庭，月貫表裏，水光鏡戶，加以來風防露，翠溼暑人之裾，冒霜停雪，碧成冬土之屋，小堂佇軸，文石如埽，得非李藥師所問訊，王子猷所嘯詠歟。時則有尚書黃夫子承北門之旨，緡東觀之籍，羔羊委蛇，魚鳥聳聳，植援激水，編町成篁，酒澆函篋之繡，墨寫升斤之影，蓋十餘年而竹以森焉，亾何尚書請老，袞衣遄歸，學士其興，簪筆能舞，良夜成韻，則犁然當心，曾久競羸，則率爾步往，或擇迷醉而補植，或見復紆而翦拂，荏苒有年，而竹復茂焉，且夫詩咏

筍，藪禮重落菹，浮亞之旨可珍，日華之胎以淪，羊奚不尊，毋棄青甯，此本義也，八十之策，乃蒟爰所爲，兼兩之載，亦汗青是削，齊簡曰等，讀書曰籀，靡蟲不傳，搜之羽陵，此進義也，尚書味道得腴，學士食字而化，波瀾莫二，屨屐相仍，洵可謂水有異味，識張陸之會居，舍開三徑，待羊求而沓至矣，况士林之館，藥院之廬，樹分五柞之蔭，泉挹九成之醴，孰謂是竹也，非浮筠之幹，截之仙山，嶰谷之產，集茲鳴鳥也哉，澤十稔移中，三宿桑下，昔栖西舫，今作東鄰，猶憶尚書居此齋時，展瑤局，開芳筵，縱露初之觴，發華始之詠，錦被之策不嗔，宮袍之奪必賞，

今則葢蘭之宅越在天末王室之弼懸乎夢想懷遠感
舊我勞如何幸也其替人則黃羊大夫其轉徙則碧雞
才士也說者乃曰官解也蘧廬也自有此屋厯有多賢
奚視爲甘棠之宅作爲瑞室之銘乎然假之丹素不能
壽其狀形之歌詠不能寫其神則無爲貴知矣故疏房
榭貌不必一再居冠倫魁能不必先後聚碧鮮玉潤不
必月日蕃圖之詩之雖風牛異轍歲節殊候而一寫在
握卽千載猶面也則謂此圖爲藏山之臥遊激懷之故
事也奚不可

任階平太史寫經圖贊

并序

階平先生博闢羣籍江唐眾言旗角繫鈴已踐舊夢樹
墨記柱尤傳家苑惇愛經典勃萃故訓以爲巾箱之妙
非賀玠所識蘭臺之私必中郎乃徵粵自開皇廢像長
興雕本人無書掌之瘁世乏壽胸之雅况血剗易滅記
珠難索天口聖譯日付苟簡良可欵也於是久鈔雪纂
蒲荒柳剝隆古言凡之概方聞申難之喙一經寫定盡
歸默識爾乃龍伸蠖屈爛兮典寶之奇紂紅許綠棗諸
虎帝之躋蓋惟用志不二故能與皤然者爭年課功必
藏故能與齟然者比遇柳氏自備古美其稱雲禎細書
今尙未輟至於給五千番之麻紙以招俊乂酬十五年

之嘉績用錫金紫則稽古之榮諒不越習者之門也爰
爲贊曰經紛綸兮井大春心若醉兮手之鶉是副墨之
子兮是雒誦之孫

藤花唵館記

藤花唵館者梁茵林方伯少時所觴詠地也楸槐貴里
檉柏小眠元瓠屯雲之勝屋山隨月之讀墨雨所瀋池
飛黑蛟寶帚所彗牆剝白蜃鏡瀾倒檻間策策堂堂之
聲蚪柯負宇作瓏瓏壘壘之狀宜乎雪松久埒沈東陽
撫之長唵晨霞采鳳李贊皇思而寄句者也亾何西向
一笑東巒遂荒禮星師子爰題秀實之居龍原書窟頓

削關西之跡而先生方入侍鸞掖出操麈符不特申嬰
室之謝抑且乏孔席之暝周捨赴官以荻爲障思光東
出居舟非水是則羅君章之蘭宅元貞子之回軒亦可
遠廬視之逆旅唾之矣然而向子思舊園生多情滄波
一蓋尙奏竽於故巢石牀雙蹠未淹蹤於闌雨憶篔簹
九夏之飲締桑下三宿之緣輒未免池夢惠連磬戀光
政繹碧激瑤翻之句則絳園在前賡黃泝竹里之章則
輞口如見此援成瑞室所以刻鍾嶸之銘而隸題浣花
抑以述端已之志也更有進者先生胸具萬間之廈而
足繭長梁才同九州之被而心儀環堵缺十住南還之

谷聽士池西潦之聲韋傳則僅賦鬻茅友讓則未謀贖
券以故疏房椽貌偶托畫禪積金連石未邀仙賚求之
華廡尤所難能澤緯蕭已破靡萍無定邱亭爰止皋廡
暫棲每入白鹿之員莊過青楊之蕭巷輒作十日思焉
何況甘棠五畝緬雅興於謝公竹林別室滌芳年於遵
彥它曰樊川墅築淮水齋成賜大官尊賭奇疆石花竹
秀野水木明瑟意將以此圖爲嚆矢乎儻用小文再泚
秃管

陳芝楣觀察傳硯圖記

傳硯圖者吾友芝楣觀察哀其兩世清德鴻筆而以文

之綸附之龍虎變化鸞鵠停峙見其神也星涵玉李雲
暈久纈肖其器也至於仲興無忝祖德超宗殊有鳳毛
垂元珪之豐髭挺匿犀之異表匪惟繼美實能亢宗而
且青鐵未敝黃丸載波產天人科第之芝博尚書僕射
之號柳誠懸所寶惟研丁公雅傳之其裔古有其事今
乃過之緬惟尊大父成都君惠雨浹於參墟英風被於
井絡祀赫桐鄉神龕羅池宜其五色錦衾之雲覆諸筆
海三躔次月之影落我石屏胸羅手摘逸氣可想尊甫
宣城君學旣博奧書復洞精攜玉帶一角磨盾鼻三斗
而油幕蓮冷廣文壇寒笏甫牲敬亭之雲頭已傾江令

之雪矣雲封凍結有深慨焉至我友芝楣觀察清節內
肅仁風外暄名達華近得元才子之目澤洽州郡接顏
有道之稱唵弄風月則呼萍妃其神講論道惠則置俊
人於側比者乘虹月之舫握英蕩之節露夕花午神怡
務閒藏孟公之牘者橐垂索智永之書者捆折結鄰常
御磨穴益深石言若曰是所謂副墨之子雒誦之孫使
礪我若白科亦無悔也夫惟范馨之硯傳之伯孫而孝
行以著端明之硯字於老泉而文祥以顯我友應升卿
之兆傳扶易之經文則繪日撫雲武則飛章草檄是以
忠貞之子復爲司隸清白之後仍生強項之才之望乃

光於家且卿且公無愧於長況復鐵面傳世鳳味有朋
聚之一室比太邱之德星寶之百禩等文貞之棠笏不
特學弓學冶溯義門之高蹤抑且如風如錐增硯譜之
嘉話云爾

謝俞陶泉太守餉車螯啟

江干蟻蟻堪供中御之拘酒畔蛤蜊屢折元長之對乃
蒼水元夸之忽至引白中脆尹以偕來自解答簪欣看
礪砢素膚勝雪比移角而能端紫殼騰花較姑勞而益
厚醞釀寒潮之味谿訝新火之光當齒卽消點湯欲化
何如北海醇醲含不兩之漿藉甚維揚甘臙啖二分之

月豈意破十城之蜃界致千里之鮭珍情深安邑之豬
肝貴壓屬州之蚌醬僕心慙劉湛議徇鍾岢北山之隱
士方飢東海之波臣難托珠宮新沐載賡揚萬里之詩
翠釜初烹敢拜王泰州之惠每當充腹輒切銘肌

謝祝蘅畦同年惠果子狸啓

綵絲繫臂方當烹鷺之辰篋絡纏身忽覩懸貍之狀喜
君以狸首為節使我操牛尾而歌為問肌膚久雪之凝
都緣梨栗霜天之飽並頒筍腊以佐肴烝白似截肪與
花豬而競美香能醒酒比竹斲以尤甘弟前處鄉關曾
驗汪龍溪之對茲來京輦又應管公明之占夢殘形以

載興去正脊而猶緩况逢五月重五之日得此八元第
八之才謹當封以糟邱薦諸鴟炙良朋高義深憐鮭食
之貧晝寢朝飢敢報荦肥之帖

謝王都轉餉果狸啓

俎肉已殘方續曾參之操

時汪鄴樓致果狸已食大半

篋鈎乍解復

賡侯氏之詩三人執牛尾而誨一笑脫貂裘而換肥白
如瓠豈柱下之相君冰雪其肌類藐姑之仙子鸞刀載
削瑤甌初蒸聚空山百果之菁華佐淺酒一樽之風味
膏流饗屢似給事之裏熊肪品極芳鮮等孝儀之夸鹿
尾君從何處致此不來儻搜之瀉霍之旁曷置之糟邱

之側特蒙推食彌切朵頤獲珍有勝于三狐競爽奚慙
于叔豹風林露圃請吟楊萬里之章沙地雪天轉憶洪
容齋之對拜嘉豨賜識愧牂生

賀喜雪啓致陶宮保

禱霧豬泉已覺天慳之破斂銅駝穴彌徵地寶之呈四
民盼五穀之精連日得六花之瑞伏惟宮保制府雲汀
先生時暘時雨已溺已飢文昌之馬才過希逸之衣旋
溼推發粟振裘之意挾纊三軍啓惠禾多麥之祥賀書
五版鋪來木屑桓公之高會初張掃入茶鐺秀實之清
風可挹縱春旗之簇簇猶臘鼓之鼕鼕憫下尺而久譽

卽封條其何礙某倦從袁臥嬾藉孫書六朝之山色如
新九陌之車塵不起因憶聚星堂上仙官賡白戰之詩
定知堆麪井邊野老夢黃雲之稼乍嘗甜雪載詠甘謠

謝俞陶泉太守餉蚶啓

暖據竈觚方欲致割羊之祭

時十二月二十三日

寵頒魁陸幾疑

開駭鹿之山列瓦縫以參差疊錢文而匝匝珍同天巒
甘號蜜丁一箸探紅湯沸春風之芼雙房釀紫酒淹明
月之光當海天欲雪之時正沙艇烹鮮之日然必淞江
東去始蓄寒苗嶺嶠南馳方登諫草若教寄遠定致役
郵何期淡然子專車而來一似左元放釣鱸之術對茲

璀璨彌切夥頤外形未折夫眉渠內味何虞其僞醬更
自哂者物非混沌人實餐饗芳鮮豈白蝠之遺呀呷類
青郎之嚼比馬甲與章舉君尤嗜南食之奇持羊酪喻
蕤羹我亦守北人之學昔也珍貽若士曾修化雀之箋
今茲送自右軍並得寶噉蚶之帖血營受益心版堅鑄
是所謂一味之甘必剖而分之百朋之錫方斯茂如也

謝汪均之餉鹿尾啓

樂章殘缺方賡狸首之詩

時汪鄴樓兄所惠
牛尾狸已食殘矣

禮注分明

復講鹿痿之法何來大尾用佐遨頭爛斑垂蒼玉之綏
圓湛截丹砂之柱旣見珍於鄴下更遙閱乎遼東故因

大惠之休明能致遠方之瑰異操刀未割感君憐爨下
之桐承筐是將引我寢隍中之葉事類拜王公之塵柄
情同餉茂先以龍脩定知卓帳筵開空矜舌醬兼笑采
薇客倦徒飲乳潼角邊之瓊片難餐頂上之珠華比貴
惟丁子之獨有實首機之所無正欲斂醫氏之門廣岐
書而作宴何妨塵太保之閣撫顏帖以裁箋象約同甘
牛心等惠

滄浪來鶴圖記

攝提之歲圍陽之月逸舟先生再權廉訪寓吳門蘇長
史之別館簿領之暇耽玩水石時則雪絮將沍風枝自

鳴昏雅畢逋莫雀噤啐有物飄然降自霄漢元裳縞衣
昂立庭除先生心詫其異目快其潔且恐俄來旋去不
須臾而海天日域矣乃復儀態閒雅不驚不憚仰啖俯
啄若習安焉不數日先生有權江甯方伯之信買艇同
載撫翎而還識者謂巢穴測天禽鳥驗氣則夫冠雀栖
宇三台其徵靈鳥滿戟屢擢不次矧髀頰駝耳燕膺鳳
翼者貴冠章服舞儀相庭識字含珠尤絕羽類知生祥
下瑞將無已時而某竊以爲一雙入雲非隱弗招二八
集扈非聲不感使子游之門如市元規之塵污人不歌
舞闐咽卽竿牘紛擾唯鶴實智且避之不暇又安望其
擇木而止傖山而歸耶是則能致鶴者先生之抱超乎
俗能調鶴者先生之才餘於官訟庭花落閒堦蜨翔可
以想風儀攷政治矣諸君子皆樂道之繪圖繫詩而某
爲識其事

人日游龍樹院詩序

粵以翦人貼帳之日登高賦詩之辰欲作海王村之游
以證輸寥館之事而宵雪嫋嫋朝霧譁譁甚妨東郭之
履無假北闕之步於是簪裹旣集舖歆其闌臺如重壁
有作屑竹之庭麩堆金井彌懷暝寒之徑乃策疲騎聯
高軒徘徊乎鹿王之宮頓憇乎龍樹之宇虛室生白小

窗多明遠眺五陁則擁絮酣卧近瞻萬雉則界墨益顯
重柯者勾喬之木疊帶者紆曲之塗掩九秋葦華之影
破蔽空烏羽之墨俄而寒吞落暉醉紅千里清挂弦月
深白一色漏鼓坎坎寺鐘沈沈疏星爍銀斜漢絡玉混
茫天接如泛烟江之濤回旋地空似入水精之域尤可
次者煦春前屈良夜已暄苛謝觥籌笑縱談柄陶陶焉
衍衍焉揚今摧古賞奇析疑膏以繼晷不知其劬茶也
嗟乎江關梅信卽在琴尊之南上元鐙火又繞星辰之
北海王村之游新霽少人尙可約焉坐客吳荷屋中丞
工詩善畫許繪一圖蔡友石問卿梅伯言郎中張石舟
大令俱工詩皆有佳什是則幽蘭儷曲各騁妍秘之詞
山陰鼓棹聊乘倏忽之興爰拈拙筆以備引隍道光十
有七年丁酉新正穀日歛程恩澤撰

修篁墩世忠廟啓

古之君子將營宮室必先寢廟吾儕小人皆有闔廬以
避寒暑當春秋之匪懈正霜露之旣濡使旁風上雨之
不支對澡藻賓蘋而有忤此新宮之暨茨與守祧之修
除爲最亟者也我世忠廟者賜額於大宋遷基於有明
規樞自程聚而來棟宇在篁墩之上雖蒼楹弗聖儉有
契乎舊章而茆龍夏衣葺必勤乎後嗣仰惟我始遷祖

太守公仁能撫衆如朱邑之祀桐鄉我忠壯公武足禦
災若李冰之射江水有功德于民者國家禮亦宜之況
我子孫念厥祖考凡神靈翔泊之所皆寤寐經營之區
必占棟隆之吉而後卽安倘有棖崩之虞其將焉仰嗟
乎服先疇食舊德叨福蔭者二千餘年備鼎俎陳犧牲
薦明禋者四十八派豈無富室傾千金之橐不爲多亦
有貧家獻一斗之粟不爲少譬之球堂上之疾雖刳臂
其何辭醫眼前之創縱剜心而弗恤惟願我同族諸尊
長諸先生本仁行仁見義集義醪青蚨萬貫得大木百
車行見有寫有樅孔曼且碩不斲不石修舊曰新天之
啓

所支允矣在高明之室神罔時怨愾然聞歎息之聲謹

和作良...

夕一

二

五



